

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI ISNIN : 2 DISEMBER 2019

**MESYUARAT KETIGA, PENGGAL KEDUA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : TUAN NOOR AMIN BIN AHMAD [KANGAR]

TARIKH : 2.12.2019 (ISNIN)

SOALAN

minta **MENTERI PEMBANGUNAN LUAR BANDAR** menyatakan apakah langkah-langkah yang sedang dan akan diambil bagi menangani isu penghijrahan penduduk dari luar bandar ke bandar kerana kurangnya peluang ekonomi di luar bandar.

JAWAPAN

Tuan Yang di-Pertua,

Untuk makluman Yang Berhormat, berdasarkan Laporan Survei Migrasi Malaysia oleh Jabatan Perangkaan Malaysia, tahun 2018, kadar migrasi dari luar bandar ke bandar adalah 4.8% berbanding kadar migrasi dari bandar ke luar bandar adalah 19.5%. Mengikut keluarga merupakan sebab utama migrasi iaitu 44.2%, diikuti dengan kerjaya (24.3%) dan persekitaran (22.4%).

Antara strategi dan program yang telah dilaksanakan oleh pihak Kementerian bagi menangani isu penghijrahan penduduk luar bandar adalah dengan melengkapkan kawasan luar bandar dengan kemudahan jalan perhubungan, bekalan air bersih dan terawat, bekalan elektrik dan mempunyai capaian internet yang baik.

Di samping itu, pelaksanaan program ekonomi seperti Projek Bersepadu Pembangunan Ekonomi Kampung (PROSPEK), Program Peningkatan Pendapatan (PPP), Program Desa Lestari, Program

Latihan Kemahiran dan Kerjaya (PLKK), program pemasaran produk selain program-program keusahawanan dan kemudahan pembiayaan perniagaan.

Selain itu, pihak Kementerian juga sedang giat mempromosi pelaksanaan program pemasaran atas talian yang dikenali sebagai Desamall@KPLB yang bertujuan membantu usahawan luar bandar memasarkan produk mereka secara atas talian melalui platform e-dagang seperti Lazada, e-Bay dan Shopee. Melalui platform ini, pemasaran produk usahawan luar bandar tidak hanya terhad untuk pasaran domestik, malah ianya juga boleh dicapai oleh pelanggan dari luar negara. Bagi menyokong pelaksanaan program Desamall@KPLB ini, pihak Kementerian sedang dalam usaha menjalinkan kerjasama dengan beberapa agensi Kerajaan untuk meningkatkan akses dan kemudahan prasarana internet di kawasan luar bandar.

Kementerian yakin, dengan pelbagai inisiatif yang dilaksanakan seperti kemudahan prasarana, program berbentuk ekonomi dan ekosistem keusahawanan yang lebih berkesan di luar bandar akan dapat membantu mengurangkan penghijrahan penduduk luar bandar ke bandar.

Disamping itu, Kementerian sedang meneliti program-program baharu untuk dilaksanakan dalam Rancangan Malaysia Ke-12, khususnya untuk mewujudkan peluang ekonomi sekaligus dapat meningkatkan pendapatan masyarakat luar bandar.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : DATO' SRI ISMAIL SABRI BIN YAAKOB
[BERA]**

TARIKH : 2 DISEMBER 2019 (ISNIN)

SOALAN

DATO' SRI ISMAIL SABRI BIN YAAKOB [BERA] minta **MENTERI KOMUNIKASI DAN MULTIMEDIA** menyatakan berapa jumlah pemilik media sosial yang telah disekat penggunaannya dan apakah sebabnya.

JAWAPAN

Tuan Yang Dipertua,

1. Untuk makluman Ahli Yang Berhormat, penyumbang utama akaun media sosial disekat adalah kerana penciptaan akaun palsu untuk tujuan penyamaran. Antara tahun 2018 sehingga September 2019, sebanyak 3,877 akaun-akaun yang menyamar telah disusuli tindakan oleh pihak Suruhanjaya Komunikasi dan Multimedia Malaysia (SKMM). Daripada jumlah tersebut, 78% daripadanya telah berjaya dipadam dengan kerjasama pihak penyedia platform media sosial, selaras dengan terma-terma dan syarat platform masing-masing.

2. Selain itu, sebanyak 1,564 pautan (URL) dan kandungan yang mempunyai kandungan berunsur buli siber dan kebencian telah dirujuk untuk perhatian dan tindakan lanjut penyedia platform media sosial seperti Facebook, Twitter, Google, Instagram dan YouTube. Daripada jumlah tersebut, 63% daripadanya telah berjaya dipadamkan berdasarkan pelanggaran terma dan syarat perkhidmatan serta pawaiian komuniti penyedia platform yang berkenaan.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 2 DISEMBER 2019 (ISNIN)

SOALAN

PUAN ALICE LAU KIONG YIENG [LANANG] minta **MENTERI KESIHATAN** menyatakan status terkini demam denggi di Sarawak dan di Malaysia dan berapa jumlah kematian yang disebabkan oleh demam denggi serta apakah langkah yang lebih drastik oleh Kementerian untuk mengurangkan masalah ini.

JAWAPAN

Yang di-Pertua,

Kes demam denggi di Malaysia pada tahun 2019 menunjukkan peningkatan yang ketara jika dibandingkan dengan tahun 2018. Peningkatan kes denggi bukan saja berlaku di Malaysia malah pada tahun 2019, peningkatan kes denggi antara satu (1) hingga lapan (8) kali ganda juga berlaku di kebanyakan Negara lain seperti Singapura, Filipina, Kemboja, Laos, Vietnam, China dan Taiwan.

Sehingga 27 November 2019, sebanyak 118,416 kes telah dilaporkan berbanding 69,849 kes bagi tempoh yang sama tahun 2018, iaitu peningkatan sebanyak 69.5% (48,567 kes). Dalam tempoh yang sama, sebanyak 164 kematian dilaporkan pada tahun ini berbanding 118 kematian pada tahun 2018, iaitu peningkatan sebanyak 46 kematian (39%). Bagi negeri Sarawak, sebanyak 2,310 kes telah dilaporkan sehingga 27 November tahun ini berbanding 687 kes pada tempoh sama tahun sebelumnya iaitu peningkatan sebanyak 1,623 kes (236.2%). Bagi

SOALAN NO : 3

kematian Denggi pula negeri Sarawak telah mencatatkan sebanyak dua (2) kematian manakala sebanyak satu (1) kematian dilaporkan pada tahun 2018.

Penyakit demam denggi amat berkait rapat dengan kebersihan persekitaran. Setiap individu perlu mengambil tanggungjawab dalam memastikan kawasan dalam dan luar rumah bebas dari potensi pembiakan nyamuk *Aedes* dengan meluangkan masa sekurang-kurangnya 10 minit seminggu untuk melakukan aktiviti pembersihan persekitaran dan menghapuskan tempat pembiakan *Aedes*. Perubahan tingkah laku masyarakat Malaysia adalah diperlukan di mana masyarakat mengutamakan kebersihan persekitaran dan tidak membuang sampah merata-rata yang akan menjadi tempat pembiakan *Aedes*.

KKM telah menjalankan tindakan bersepadu melalui Pasukan Petugas Khas Denggi Peringkat Kementerian yang terdiri dari tujuh (7) Kementerian, Kerajaan negeri dan Pihak Berkuasa Tempatan (PBT) serta Agensi lain. Tindakan yang telah dan sedang dilaksanakan adalah:

- a) Melaksanakan kempen Gotong-Royong Perangi *Aedes* dan aktiviti pembersihan persekitaran dengan kerjasama Kementerian, agensi dan Kerajaan Negeri seperti KPKT (PBT), RELA, PDRM, KPM, PERPADUAN, ATM serta APM yang dilaksanakan sebanyak dua (2) kali setahun. Pada tahun 2019, ianya dilaksanakan bulan Mac dan September 2019;
- b) Operasi Gempur *Aedes* Bilangan 1.0 yang dilakukan dari bulan Januari hingga Mac 2019 dan Operasi Gempur *Aedes* Bilangan 2.0 dari bulan Julai hingga September 2019, di samping operasi bersepadu secara bulanan yang dilakukan oleh KKM bersama Agensi seperti CIDB, PBT, JKR DOSH dan lain-lain;
- c) Pasukan Khas Pendidikan Kesihatan (PAKAT) dan Pasukan Sukarelawan COMBI yang terdiri dari komuniti untuk melaksanakan aktiviti 'cari dan musnah' setiap minggu. Di samping itu, pendidikan mengenai denggi turut dilakukan melalui lawatan dari rumah ke rumah beserta edaran bahan pembunuh jentik-jentik;

SOALAN NO : 3

- d) KKM juga sedang menggunakan kaedah inovasi kawalan Denggi dengan menggunakan semburan *Outdoor Residual Spraying (ORS)* yang dilaksanakan di kawasan berstrata hotspot; dan
- e) Inisiatif terkini yang dilaksanakan oleh KKM adalah melalui inisiatif inovasi kawalan denggi iaitu pelepasan telur nyamuk *Aedes* ber*Wolbachia* bagi menggantikan populasi nyamuk *Aedes* liar yang membawa virus denggi. Dengan kehadiran bakteria *Wolbachia* dalam nyamuk *Aedes*, ia akan merencatkan perkembangan virus denggi dalam badan nyamuk dan mengurangkan risiko jangkitan virus denggi kepada manusia lain. Operasi ini dilakukan berikutan keputusan kajian IMR yang dapat mengurangkan 50-70% kes denggi di lokaliti kajian. Fasa pertama operasi ini telah dijalankan di 11 lokaliti di Daerah Petaling dan Wilayah Persekutuan Kuala Lumpur dan hasil inovasi ini masih dalam penelitian.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT MESYUARAT KETIGA,
PENGAL KEDUA, PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI AHMAD BIN HAJI
MASLAN [PONTIAN]**

TARIKH : 2 DISEMBER 2019 (ISNIN)

SOALAN

Minta **MENTERI PEMBANGUNAN USAHAWAN** menyatakan langkah terperinci dan peruntukan untuk setiap langkah bagi meramaikan jumlah usahawan berdaya maju di sekitar 20 ribu buah kampung seluruh negara. Berikan angka usahawan luar bandar mengikut 14 negeri dan beri 10 nama syarikat yang paling berjaya untuk setiap negeri.

JAWAPAN

Tuan Yang di-Pertua,

1. Jumlah usahawan luar bandar mengikut negeri adalah seperti berikut:

Bil	Negeri	Jumlah	Peratus (%)
1	Kelantan	17,989	21.4
2	Melaka	13,284	15.8
3	Perak	8,187	9.8
4	Kedah	6,352	7.6
5	Pahang	5,453	6.5
6	Selangor	5,377	6.4

7	Terengganu	4,622	5.5
8	Johor	4,615	5.5
9	Pulau Pinang	3,777	4.5
10	Sabah	3,698	4.4
11	Sarawak	3,354	4.0
12	Negeri Sembilan	3,239	3.9
13	Perlis	2,639	3.1
14	W.P. Kuala Lumpur	1,343	1.6
15	W.P. Labuan	5	0.0
	Jumlah	83,934	100

Sumber: Kementerian Pembangunan Luar Bandar (KPLB)

2. Senarai syarikat yang berjaya di setiap negeri boleh dinilai berdasarkan penilaian SCORE (penarafan 4 dan 5 bintang) oleh SME Corp. Konsep Penarafan Daya Saing PKS bagi Peningkatan (SCORE) ini merupakan alat diagnostik untuk menilai dan meningkatkan daya saing PKS berdasarkan prestasi dan daya saing mereka. Antara kriteria yang diambil kira adalah kekukuhan kewangan, prestasi perniagaan, sumber manusia, pemerolehan dan penerapan teknologi, pensijilan dan kehadiran pasaran.

3. Antara program-program baharu yang telah diperkenalkan dan dilaksanakan oleh MED bagi meramalkan jumlah usahawan berdaya maju di kawasan luar bandar/ kampung adalah seperti berikut:

- (i) **Program Pemangkin Usahawan Sosial Hebat (PUSH)** merupakan program "*Social Enterprise Development*" (SED) oleh MaGIC yang memberikan pendedahan kepada usahawan mengenai perniagaan francais. Inisiatif ini dapat meningkatkan kesan sosial positif di samping mengembangkan perniagaan yang dipacu oleh perusahaan berpertumbuhan tinggi.
- (ii) **Projek Rintis Pembangunan Usahawan Tani Fertigasi (PRINT)** merupakan kerjasama MED dan INSKEN yang dilaksanakan di Terengganu sejak Jun 2019. Ianya mensasarkan penglibatan komuniti B40 melalui galakan

keusahawanan dalam bidang tanaman fertigasi. Melalui program ini, usahawan baharu dijangka menjana pendapatan bersih sekurang-kurangnya RM3,000 sebulan dan menggiatkan penglibatan mereka dalam bidang pengeluaran tanaman makanan secara komersil. Program ini akan diperkembangkan ke seluruh negeri mulai tahun hadapan bermula dengan Negeri Sarawak.

Program pembiayaan yang telah ditawarkan termasuk:

- (i) **Program Pembiayaan Premis Usahawan (i-3P)**
Pembiayaan yang fleksibel untuk usahawan memiliki atau membiayai semula premis perniagaan seperti rumah kedai, lot kedai, ruang pejabat dan kilang sama ada yang telah selesai atau masih dalam pembinaan. Jumlah kelulusan pembiayaan RM62.56 juta.
- (ii) **Skim Pembiayaan Ekonomi Desa (SPED)**
Memfokuskan kepada pengusaha Bumiputera luar bandar bagi memulakan perniagaan, meningkatkan ekonomi serta meningkatkan perusahaan yang diceburi. Jumlah kelulusan pembiayaan RM2.02 juta.
- (iii) **Pembiayaan Kontrak dan MySMEBina**
Pembiayaan khas untuk membiayai kontrak pembinaan dan infrastruktur serta kontrak mudah yang berjangka pendek bagi melaksanakan serta menyempurnakan projek dalam tempoh kontrak yang telah ditetapkan. Jumlah kelulusan pembiayaan RM477,400.000.
- (iv) **Program Pembiayaan MySMEBekal**
Pembiayaan khas untuk membiayai kontrak pembekalan dan penyelenggaraan secara terus (tanpa proses nilai tambah) yang berjangka pendek tanpa sebarang cagaran.
- (v) **Program Pembiayaan Perniagaan Kecil (SBF)**
Fokus untuk meningkat peluang peniaga mikro yang berpotensi besar untuk menceburi bidang perniagaan baru.

Program ini menyediakan kemudahan pembiayaan modal kerja dan modal pusingan. Jumlah kelulusan pembiayaan RM1.58 juta.

Program pembangunan usahawan di bawah SME Corp.:

(i) **Program Rangkaian Mikro (*Micro Connector*)**

Program ini menawarkan bantuan di peringkat permulaan kepada usahawan mikro untuk memulakan dan menjalankan perniagaan. Sehingga kini, sejumlah 5 syarikat telah dilantik bagi melatih dan menyediakan perkhidmatan kepada B40 serta usahawan mikro, dan 18 peserta B40 telah mendapat manfaat.

(ii) **Program *Women Netpreneur & Digital Business Workshop***

Program ini diadakan di Kuching, Miri, Kota Kinabalu dan Tawau yang bertujuan mendedahkan serta menggalakkan penglibatan usahawan wanita dalam perniagaan atas talian. Seramai 421 peserta telah mengikuti program ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 2 DISEMBER 2019 [ISNIN]

SOALAN NO. 5

Minta **MENTERI PERUMAHAN DAN KERAJAAN TEMPATAN** menyatakan beberapa pemaju, nama mereka dan projek perumahan serta rasional pemaju-pemaju ini diberikan pengecualian daripada bayaran cagaran 3% anggaran kos pembinaan di bawah seksyen 6(1)(a) Akta Pemajuan Perumahan (Kawalan dan Pelesenan) 1966 (Akta 118).

JAWAPAN

Tuan Yang di-Pertua,

1. Untuk makluman Yang Berhormat, di bawah peruntukan 6(1)(a) dan 6(1)(b) Akta Pemajuan Perumahan 1966 (Akta 118), mana-mana pemaju perumahan yang memohon Lesen Pemajuan Perumahan dan Permit Iklan dan Penjualan adalah diwajibkan untuk mempunyai modal terbitan dan modal terkumpul secara tunai yang tidak kurang dari RM250,000 serta mendepositkan ke dalam Akaun Pemajuan Perumahan (ataupun mengemukakan Jaminan Bank kepada Pengawal Perumahan) suatu jumlah bersamaan dengan 3% daripada anggaran kos pembinaan seperti yang diperakui oleh arkitek yang bertanggungjawab untuk pemajuan tersebut.
2. Perkiraan kos pembinaan dalam konteks pemajuan perumahan ialah suatu perkadaran yang bersamaan dengan *Gross Development Cost* dan kos konsultan yang dilantik oleh pemaju bagi pemajuan tersebut.
3. Subseksyen 6 (syarat atau sekatan bagi pemberian lesen) di bawah Akta 118 turut menggariskan bahawa syarat dan sekatan pemberian lesen tersebut adalah tertakluk kepada kuasa penepian oleh Menteri di bawah subseksyen 2 yang menetapkan bahawa Menteri boleh mengecualikan mana-mana pemaju perumahan atau rumah tempat tinggal daripada mana-mana atau semua peruntukan Akta bagi suatu tempoh dan tertakluk kepada had-had, sekatan-sekatan atau syarat-syarat tertentu sebagaimana yang ditentukan oleh Menteri.
4. Untuk makluman Yang Berhormat juga, dari Januari 2016 sehingga November 2019, sebanyak **184 pengecualian** melibatkan **122 syarikat** pemajuan telah diluluskan oleh YB Menteri KPKT. Daripada jumlah ini, **21** kelulusan diberikan pada tahun **2016**, **72** kelulusan pada tahun **2017**, **48** kelulusan pada tahun **2018** dan **43** kelulusan pada tahun **2019** (Januari hingga November 2019).

5. Pengecualian deposit 3% dan penetapan kepada deposit nominal RM200,000.00 adalah diberikan bagi pemajuan yang melibatkan pembinaan unit-unit bersubsidi atau dibawah program inisiatif Rumah Mampu Milik (RMM) yang dilancarkan oleh kerajaan persekutuan dan kerajaan negeri seperti PR1MA, PPAM (Perumahan Penjawat Awam Malaysia), RUMAWIP (program Residensi Wilayah di bawah Kementerian Wilayah Persekutuan), Rumah SelangorKu, RMM Perak, RMM Melaka, PRIMA Pahang dan RMM Johor.

6. Pengecualian deposit dan penetapan deposit nominal RM200,000.00 bagi program Rumah Mampu Milik ini adalah sebagai insentif kepada pemaju untuk terlibat di dalam memajukan pemajuan rumah di bawah harga kawalan atau di bawah harga jualan RM350,000.00. Kerajaan faham bahawa pemajuan RMM tidak memberikan pulangan atau profit margin yang tinggi kepada pemaju; sesetengah dari program ini adalah berdasarkan ketetapan dasar perumahan di peringkat kerajaan negeri yang diwajibkan untuk pemaju-pemaju yang menjalankan pemajuan berskala besar. Kegagalan untuk membina unit-unit boleh mengakibatkan pemaju dikenakan penalti atau denda yang memberikan implikasi yang besar terhadap pemaju.

7. Dalam menimbangkan sesuatu rayuan pengecualian daripada bayaran cagaran 3% anggaran kos pembinaan, Menteri turut mengambil kira beberapa kriteria untuk memastikan kepentingan pembeli adalah dilindungi. Antara kriteria yang ditetapkan adalah seperti berikut:

- i. Semakan senarai hitam atau rekod pemajuan perumahan yang pernah dijalankan oleh Pemaju yang memohon;
- ii. Tanggungan liabiliti dan keuntungan selepas cukai syarikat pemaju; dan

- iii. Suatu perkadaran pengurangan deposit yang akan ditetapkan bagi permohonan tersebut berdasarkan saiz dan jumlah unit yang dilesenkan.

8. Penetapan kriteria oleh Menteri bagi pertimbangan sesuatu permohonan pengecualian ini adalah kriteria tambahan kepada syarat sekatan permohonan lesen yang ditentukan oleh Pengawal Perumahan. Ini adalah untuk memastikan bahawa pertimbangan pengecualian ini tidak dibuat secara sewenang-wenangnya serta mengambil kira keperluan kemampuan kewangan syarikat untuk menyiapkan projek berkenaan.

9. Walaupun pemaju dikecualikan daripada mengemukakan bayaran deposit 3% berdasarkan kepada kos pembinaan, pemaju masih diwajibkan untuk mengemukakan suatu perkadaran yang ditetapkan oleh Menteri bagi menggantikan jumlah deposit 3% tersebut. Penggantian deposit ini adalah bagi memastikan terdapat suatu jumlah *collateral* atau jaminan yang boleh digunakan untuk memulihkan atau menyelamatkan mana-mana pemajuan yang mungkin menghadapi masalah semasa tempoh pembinaan.

10. Rasional yang dikemukakan oleh pihak pemaju bagi pengecualian deposit 3% dan penetapan jumlah pengurangan adalah pelbagai seperti komitmen kewangan syarikat bagi jumlah pemajuan semasa, perkiraan kos pembinaan dan kos pematuhan (*compliance cost*) yang tinggi, anggaran penjualan unit pemajuan dalam tempoh pembinaan, keperluan kos pemajuan yang tinggi seperti bayaran premium tanah, kos kewangan, kos tetap (termasuk bayaran gaji, sewaan dan sebagainya) serta kos pemasaran pemajuan.

11. Perlu diambilkira bahawa, bagi sesetengah pemajuan berskala besar dan mengandungi jumlah unit rumah yang banyak, jumlah deposit 3% boleh mencecah sehingga jutaan ringgit dan membebankan syarikat pemaju yang perlu mencari sumber kewangan dari fasiliti perbankan dan

sumber lain untuk menampung kos pembinaan serta memastikan cadangan pemajuan tidak tergendala. Penetapan peruntukan mewajibkan suatu perkadaran deposit 3% di bawah Akta 118 ini adalah untuk memastikan bahawa hanya syarikat pemaju yang benar-benar berkemampuan dan mempunyai sumber kewangan serta kepakaran di dalam sektor pemajuan perumahan sahaja yang akan dipertimbangkan suatu pemberian Lesen Pemajuan Perumahan dan Permit Iklan & Penjualan.

12. Justeru itu, perlu ditekankan bahawa penetapan kriteria oleh Menteri bagi pertimbangan suatu permohonan pengecualian deposit ini adalah on top atau pun kriteria tambahan kepada syarat sekatan permohonan lesen yang ditentukan oleh Pengawal Perumahan. Dengan menetapkan suatu jumlah deposit sebagai syarat bagi kelulusan pengecualian ini, Menteri turut mengambilkira bahawa pemaju masih dikenakan suatu collateral yang signifikan bagi memastikan pemaju tidak mengabaikan obligasinya sebagai pemaju yang dilesenkan di bawah Akta 118. Pertimbangan pengecualian ini tidak dibuat secara sewenang-wenangnya serta mengambilkira keperluan kemampuan kewangan syarikat untuk menyiapkan projek tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SRI DR. HAJI ISMAIL BIN
HAJI ABD. MUTTALIB [MARAN]**

TARIKH : 2 DISEMBER 2019 (ISNIN)

SOALAN

Minta **MENTERI PELANCONGAN, SENI DAN BUDAYA** menyatakan:-

- a) statistik kes dan tindakan berkesan yang diambil bagi menangani penipuan oleh ejen pelancongan terutamanya yang melibatkan ibadah umrah; dan
- b) bentuk galakan baharu yang disalurkan bagi memantapkan lagi promosi pelancongan negara kepada pelancong dalam dan luar negara.

JAWAPAN

Tuan Yang di-Pertua,

(a)

Untuk makluman Ahli Yang Berhormat, bagi tempoh 2014 sehingga Oktober 2019, Kementerian telah mengambil tindakan ke atas 2,035 aduan berkaitan industri pelancongan dengan 391 aduan berkaitan perniagaan pengendalian pakej umrah atau ziarah. Bagi tempoh sama, sebanyak 612 kertas siasatan telah dibuka di bawah Akta Industri Pelancongan 1992 [Akta 482]. Sebanyak 91 kes daripada jumlah tersebut adalah melibatkan perniagaan berkaitan pengendalian umrah atau ziarah yang telah dikeluarkan tawaran kompaun di bawah Akta 482 yang berjumlah RM701,000.

Bagi tahun 2019 (sehingga Oktober), 350 aduan telah diterima oleh pihak Kementerian dengan 48 aduan adalah berkaitan perniagaan pengendalian pakej umrah atau ziarah. Pihak Kementerian telah mengambil tindakan ke atas 7 kes berkaitan umrah atau ziarah dengan mengeluarkan tawaran kompaun berjumlah RM129,500 di bawah Akta 482. Bagi tempoh 2018 sehingga Oktober 2019, pihak Kementerian juga telah membawa 3 kes ke mahkamah yang melibatkan kesalahan menjalankan perniagaan pengendalian pakej umrah atau ziarah tanpa lesen di bawah Akta 482.

Bagi tempoh 2009 hingga 2017, pihak Kementerian juga telah membatalkan lesen perniagaan 12 syarikat pengendali umrah atau ziarah kerana didapati menjalankan perniagaan mengikut cara yang memudaratkan kepentingan awam khususnya yang terlibat dengan kes-kes penipuan dan menyenarai hitam para pengarah serta pemilik syarikat daripada mendapat lesen perniagaan berkaitan pelancongan dengan pihak Kementerian di masa akan datang.

Untuk makluman Ahli Yang Berhormat, selain mengambil tindakan ke atas aduan dan penguatkuasaan selaras dengan Akta 482, langkah-langkah berterusan lain yang turut diambil oleh pihak Kerajaan untuk mengurangkan kes-kes penipuan antaranya dengan mendidik orang

NO. SOALAN: 6

awam. Bagi tujuan itu, pihak Kementerian bersama-sama persatuan industri pelancongan giat bekerjasama memberi kesedaran kepada orang awam dalam mengelakkan diri daripada ditipu dalam pembelian pakej umrah atau ziarah.

Pihak Kementerian juga mengadakan kempen kesedaran awam secara digital dengan mengeluarkan video khidmat nasihat dan tips percutian melalui media sosial dan media elektronik kepada orang awam dalam pembelian pakej percutian atau pakej umrah dan kepentingan membeli insurans perjalanan khususnya melibatkan percutian ke luar negeri.

Tuan Yang di-Pertua,

(b)

Dalam memantapkan lagi promosi pelancongan negara kepada pelancong dalam dan luar negara, Kerajaan telah memperkenalkan bentuk galakan baru iaitu Geran Sepadan yang dikenali sebagai GAMELAN (Galakan Melancong Malaysia) yang bertujuan untuk mempergiatkan program Promosi dan Pemasaran bagi meningkatkan ketibaan pelancong asing ke Malaysia di samping merancakkan pelancongan domestik. Geran ini diselaraskan oleh Tourism Malaysia (TM) dan sebanyak 310 permohonan berjumlah RM1.5 juta telah diluluskan setakat ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB TUAN AWANG HUSAINI BIN DATUK SAHARI
KAWASAN : PUTATAN
TARIKH : 02 DISEMBER 2019 (ISNIN)

SOALAN :

YB TUAN AWANG HUSAINI BIN DATUK SAHARI minta **MENTERI KERJA RAYA** menyatakan apakah status projek:

- (a) cadangan menaik taraf Jalan Ramayah Ke Jalan Putatan termasuk "Flyover" di Putatan dan cadangan menaik taraf Jalan Kolam ke Sunny Garden ke Kampung Minintod termasuk pembinaan dua "Flyover"; dan
- (b) Cadangan menaik taraf Jalan Ramayah menghubungkan Jalan Putatan dan Jalan Penampang "Bypass".

JAWAPAN :

Tuan Yang Di-Pertua,

Untuk makluman Ahli Yang Berhormat, berdasarkan semakan Kementerian ini dengan Jabatan Kerja Raya Negeri Sabah, jalan - jalan yang dinyatakan oleh Ahli Yang Berhormat, iatu Jalan Ramayah ke Putatan, Jalan Kolam ke Sunny Garden ke Kampung Minitod, dan Jalan Penampang Bypass adalah merupakan Jalan Negeri. Sehubungan dengan itu, jalan-jalan ini tidak tersenarai di dalam senarai keutamaan oleh JKR Negeri Sabah di dalam permohonan projek baharu di bawah *Rolling Plan 4* (RP4 2020), RMKe-11 kerana jalan-jalan ini merupakan jalan-jalan Negeri di mana sebarang perancangan untuk menaik taraf jalan-jalan tersebut adalah di bawah bidang kuasa Kerajaan Negeri Sabah.

Walau bagaimanapun, Kementerian ini mengambil maklum berkenaan masalah kesesakan lalu lintas sedia ada justeru itu mencadangkan kepada JKR Negeri Sabah untuk mengambil langkah segera dengan mengenalpasti dan melaksanakan tindakan rawatan setempat (*localized remedial measures*). Manakala bagi tindakan jangka panjang, Kerajaan Negeri boleh mengambil tindakan untuk menaiktaraf infrastruktur jalan – jalan ini mengikut keperluan serta kemampuan Kerajaan Negeri memandangkan ianya di bawah bidang kuasa pihaknya.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

DARIPADA : DR. NIK MUHAMMAD ZAWAWI BIN HAJI SALLEH [PASIR PUTEH]

TARIKH : 2 DISEMBER 2019 (ISNIN)

SOALAN

DR. NIK MUHAMMAD ZAWAWI BIN HAJI SALLEH [PASIR PUTEH] minta **MENTERI KOMUNIKASI DAN MULTIMEDIA** menyatakan peratus liputan rangkaian internet TM Unifi terkini mengikut negeri-negeri dan apakah langkah-langkah untuk mempertingkatkan jaringan internet di Kelantan agar selari dengan negeri-negeri maju yang lain.

JAWAPAN

1. Untuk makluman Ahli Yang Berhormat, projek untuk menaik taraf rangkaian Jalur Lebar Unifi telah bermula di Negeri Kelantan sejak tahun 2015 di bawah inisiatif Jalur Lebar Berkelajuan Tinggi (HSBB) - Fasa 2 dan Projek Jalur Lebar Pinggir Bandar (SUBB). Projek HSBB Fasa 2 telah dimulakan di 4 ibusawat ; Kota Bharu, Kubang Kerian, Pengkalan Chepa dan Jeli manakala bagi projek SUBB, ia telah dijalankan di 26 buah ibusawat pinggir bandar di seluruh negeri Kelantan.
2. Melalui projek usahasama antara Kementerian Komunikasi dan Multimedia Malaysia (KKMM) dengan Telekom Malaysia Berhad (TM) ini, sebanyak 22,838 sambungan internet (ports) telah disediakan sehingga tahun 2018 dimana pelanggan-pelanggan di negeri ini telah dapat menikmati perkhidmatan jalur lebar berkelajuan tinggi .
3. Perluasan rangkaian UniFi di negeri Kelantan telah diteruskan oleh TM dalam pelaburan projek-projek berpotensi sama ada dalam bandar dan luar bandar - menjadikan keseluruhan jumlah ports UniFi yang

tersedia adalah sebanyak 24,586 sehingga suku ketiga 2019. Pelaksanaan projek menaiktaraf UniFi ini akan terus dan sedang giat dijalankan dengan jangkaan sebanyak 5,000 port tambahan lagi telah dirancang sehingga akhir 2019 - menjadikan jumlah port sambungan UniFi sebanyak 30,000 menjelang akhir 2019.

4. Sehingga kini, semua 10 daerah dan jajahan di negeri ini telah termasuk dalam lokasi projek naik taraf UniFi bagi membolehkan capaian internet berkelajuan tinggi dapat disediakan kepada penduduk di seluruh negeri Kelantan. Untuk makluman Yang Berhormat juga, dari masa ke semasa projek naik taraf rangkaian 'copper' kepada gentian optik fiber akan dilaksanakan secara berperingkat mengikut jadual perancangan pembangunan jangka panjang TM.

5. Dengan jumlah sambungan internet UniFi sebanyak 24,584 yang telah disediakan, masih terdapat banyak sambungan internet UniFi yang boleh ditawarkan kepada rakyat Kelantan. Sehingga kini, kadar langganan UniFi adalah sebanyak 40 peratus.

6. Perluasan rangkaian UniFi di negeri Kelantan akan dipertingkatkan lagi dalam perancangan pada tahun 2020 dimana sebanyak 22,000 port sambungan internet akan disediakan yang menjadikan keseluruhan jumlah sambungan internet talian tetap menjelang akhir tahun 2020 dianggarkan berjumlah 52,000.

7. Dalam masa yang sama, TM sedang mempromosi jumlah sambungan internet UniFi yang masih kosong disamping menggiatkan usaha menaik taraf 24,000 pelanggan Streamyx sedia ada ke rangkaian UniFi. Selain daripada itu, penawaran perkhidmatan jalur lebar menggunakan teknologi tanpa wayar melalui perkhidmatan UniFi Air dan UniFi Mobile akan sentiasa dirancang dan dipertingkat mengikut keperluan dari masa ke semasa.

**MESYUARAT KETIGA, PENGGAL KEDUA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : TUAN MUSLIMIN BIN YAHAYA
[SUNGAI BESAR]**

TARIKH : 2.12.2019 (ISNIN)

SOALAN

minta **MENTERI PEMBANGUNAN LUAR BANDAR** menyatakan adakah usaha untuk menambah bilangan lampu jalan kampung di setiap kampung dan desa.

JAWAPAN

Tuan Yang di-Pertua,

Untuk makluman Yang Berhormat, Program Pemasangan Lampu Jalan Kampung (LJK) yang dilaksanakan oleh Kementerian Pembangunan Luar Bandar (KPLB) telah dimulakan sejak tahun 2002, dan sehingga projek tahun 2018, sebanyak 464,139 unit telah dipasang di seluruh Malaysia.

Bagi pelaksanaan Program Pemasangan LJK Tahun 2019/2020 pula, KPLB telah diberi peruntukan sebanyak RM50 juta, untuk sasaran pemasangan baru sebanyak 35,000 unit LJK lagi.

Di samping itu juga, usaha KPLB untuk menambah bilangan pemasangan LJK ini diteruskan lagi dengan tambahan sebanyak 25,000 unit LJK jenis *light emitting diode* (LED), dari dana *Incentive-Based Regulations* (IBR). LJK tambahan ini merupakan inisiatif KPLB untuk menambah LJK di setiap kampung dan desa, dengan kerjasama Kementerian Tenaga, Sains, Teknologi, Alam Sekitar & Perubahan Iklim (MESTECC), dan akan dipasang bersekali dengan LJK daripada Program Pemasangan LJK Tahun 2019/2020.

Ini menjadikan jumlah keseluruhan LJK yang akan dipasang bagi tempoh 2019/2020 adalah sebanyak 60,000 unit, dengan pecahan 26,000 unit LJK jenis *high pressure sodium vapour* (HPSV) dan 34,000 unit LJK jenis LED, dan jumlah ini akan diagihkan mengikut Parlimen untuk pemasangan segera.

Untuk makluman Yang Berhormat juga, pelaksanaan program LJK adalah untuk menceriakan kawasan liputan supaya kegiatan ekonomi, sosial dan riadah dapat dijalankan pada waktu malam dengan selesa dan selamat. Pelaksanaan program LJK adalah secara berperingkat-peringkat dan kos operasi serta penyenggaraan akan ditanggung oleh Kerajaan secara berterusan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI ABDUL RAHMAN
BIN MOHAMAD [LIPIS]**

TARIKH : 2 DISEMBER 2019 [ISNIN]

SOALAN

Minta **MENTERI PERUMAHAN DAN KERAJAAN TEMPATAN** menyatakan program-program baharu dan gantian yang diperkenalkan kepada rakyat sekiranya Program Perumahan Rakyat (PPR) yang dilaksanakan oleh Kerajaan terdahulu dimansuhkan.

JAWAPAN

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) bercadang untuk menjenamakan semula Program Perumahan Rakyat (PPR) kepada Program Perumahan Malaysia (PPM) yang akan melibatkan peningkatan luas lantai minima unit rumah daripada 700kps kepada 900kps selaras dengan Dasar Rumah Mampu Milik Negara (DRMM) yang telah dilancarkan pada 11 Mei 2019.

2. Selain itu, melalui cadangan penjenamaan semula ini, harga jualan unit rumah PPM juga akan dinilai semula pada harga RM300,000 dan ke bawah selaras dengan Dasar Perumahan Mampu Milik (DRMM). Untuk makluman Yang Berhormat juga, melalui program sedia ada, unit-unit PPR yang telah siap akan dijual dengan harga RM35,000 seunit di Semenanjung dan RM42,000 di Sabah dan Sarawak. Dalam hal ini, Kerajaan terpaksa menanggung penyediaan subsidi hampir mencecah RM150,000 bagi seunit rumah. Oleh yang demikian, KPKT berpandangan harga jualan tersebut perlu dinilai semula dan penyediaan subsidi yang tinggi di pihak Kerajaan adalah amat membebankan untuk jangka masa panjang.

3. Walaupun cadangan penjenamaan semula PPR ini akan melibatkan perbezaan harga rumah yang ketara, Kerajaan akan sedaya mampu menyediakan bantuan kepada golongan B40 untuk memiliki rumah melalui kaedah sewaan secara *Rent to Own* atau *end financing* tertentu yang sedang dalam peringkat rundingan antara KPKT dengan institusi kewangan.

4. Untuk makluman Yang Berhormat juga, cadangan KPKT untuk penjenamaan semula PPR ini telah dipanjangkan kepada semua Kerajaan Negeri melalui surat bertarikh 20 Ogos 2019. Oleh yang demikian, sebarang pandangan dan ulasan yang diterima daripada Kerajaan Negeri akan diteliti dan diberi perhatian dalam cadangan penjenamaan semula PPR ini.

Sekian, terima kasih.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

DARIPADA : TUAN OSCAR LING CHAI YEW [SIBU]

TARIKH : 2 DISEMBER 2019

SOALAN

TUAN OSCAR LING CHAI YEW [SIBU] minta **MENTERI LUAR NEGERI** menyatakan nilai sumbangan perikemanusiaan Kerajaan ikut pecahan dari tahun 2010 hingga 2019 kepada:

(a) negeri-negeri muslim umpamanya Palestine, Rohingya, Syria, Afghanistan, Kashmir, Mindanao, Pattani; dan

(b) negeri-negeri bukan muslim seperti Timor Leste, Cambodia, Sri Lanka, China dan sebagainya.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat SibU atas pertanyaan yang dikemukakan.

Tuan Yang di-Pertua,

2. Untuk makluman Dewan yang mulia ini, Malaysia sentiasa prihatin terhadap isu-isu kemanusiaan yang berlaku di negara-negara luar, tanpa mengambil kira latar belakang agama, budaya dan etnik yang terlibat. Penyaluran sumbangan kemanusiaan daripada Malaysia kepada negara-negara luar ini dibahagikan kepada dua bentuk iaitu sama ada dalam bentuk bantuan kewangan atau dalam bentuk bantuan-bantuan lain seperti sumbangan barangan keperluan asas, barangan dan perkhidmatan kesihatan, latihan dan pembangunan modal insan dan lain-lain.

Tuan Yang-di-Pertua,

(Palestin)

3. Sumbangan Malaysia kepada Palestin disalurkan melalui pertubuhan-pertubuhan antarabangsa seperti *United Nations Relief and Works Agency* (UNRWA), *Organisation of Islamic Cooperation* (OIC) dan *United Nations Register for Damages* (UNRoD) yang dianggarkan berjumlah USD12.85 juta (RM54.3 juta) sejak tahun 2011. Bantuan kepada rakyat Palestin juga turut disalurkan melalui Akaun Amanah Kemanusiaan Rakyat Palestin (AAKRP) yang telah ditubuhkan sejak tahun 2002. Sumber kewangan AAKRP secara amnya adalah daripada sumbangan rakyat Malaysia kepada rakyat Palestin.

(Rohingya)

4. Sementara itu, melihat kepada tuntutan kemanusiaan yang mendesak di kem-kem pelarian Rohingya di Bangladesh, Malaysia telah

menubuhkan Hospital Medan di Cox's Bazar, Bangladesh pada Disember 2017 yang menyediakan perkhidmatan kesihatan bukan sahaja kepada pelarian Rohingya, malah kepada rakyat tempatan Bangladesh. Selain itu, Malaysia juga telah menghantar misi bantuan kemanusiaan di bawah penyelarasan Kerajaan pada 9 September 2017, 7 Oktober 2017, 22 Oktober 2017 dan 27 Januari 2018 dengan berat keseluruhan 107 tan. Bantuan kemanusiaan tersebut merupakan barangan keperluan asas seperti makanan, ubat-ubatan dan penjagaan kebersihan.

5. Selain itu, bantuan kewangan sebanyak USD100,000.00 (RM422,570.00) turut diberikan untuk isu pelarian Rohingya yang disalurkan menerusi ASEAN Coordinating Centre for Humanitarian Assistance on Disaster Management (AHA Centre) bagi membantu Kerajaan Myanmar dalam usaha-usaha repatriasi pelarian Rohingya.

(Indonesia)

6. Sebagai jiran terdekat, Malaysia turut prihatin terhadap bencana alam yang melanda Indonesia. Kerajaan Malaysia telah menyalurkan sumbangan sebanyak RM1,000,000 kepada Badan Nasional Penanggulangan Bencana Indonesia (BNPB) berikutan kejadian tsunami dan gempa bumi yang melanda Palu dan Donggala di Sulawesi Tengah, Indonesia pada 28 September 2018.

Tuan Yang di-Pertua,

(China)

7. Berhubung sumbangan kepada Kerajaan China pula, pihak Kementerian Luar Negeri pernah menyalurkan sumbangan sebanyak RM1,000,000 pada tahun 2013 berikutan kejadian gempa bumi yang melanda wilayah Sichuan pada 20 April 2013.

(Jepun)

8. Malaysia juga pernah memberikan sumbangan kemanusiaan sebanyak RM500,000 kepada Kerajaan Jepun bagi membantu mangsa-mangsa banjir di kawasan tengah dan selatan Pulau Honshu, Jepun serta mangsa-mangsa gelombang haba melampau (*heat wave*) pada tahun 2018.

(Lao PDR)

9. Selain itu, Malaysia turut memberikan sumbangan kemanusiaan sebanyak USD100,000 (RM422,570) yang disalurkan terus kepada Kerajaan Lao PDR berikutan banjir besar yang berlaku pada Julai 2018.

(Bahamas)

10. Terkini, Kerajaan Malaysia akan menyalurkan sumbangan kepada negara Bahamas sebanyak USD25,000 (RM105,000) untuk membantu kerja-kerja pemulihan ekoran Taufan Dorian yang melanda negara tersebut pada 1 September 2019.

Tuan Yang di-Pertua,

11. Sebagai penutup, ingin saya memaklumkan bahawa Kerajaan sentiasa komited terhadap isu-isu kemanusiaan dan memastikan tindakan-tindakan yang diambil oleh Malaysia tidak terbatas kepada agama, budaya dan etnik tertentu.

12. Kerajaan akan sentiasa membuat penilaian sewajarnya bagi memastikan sumbangan negara dapat diberikan kepada negara-negara luar yang memerlukan dan ianya disalurkan secara efektif tanpa melibatkan sebarang implikasi terhadap hubungan diplomatik Malaysia.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS

PERTANYAAN : LISAN

DARIPADA : SHAHARIZUKIRNAIN BIN ABD. KADIR [SETIU]

TARIKH : 2 DISEMBER 2019 (ISNIN)

SOALAN

SHAHARIZUKIRNAIN BIN ABD. KADIR [SETIU] minta MENTERI KESIHATAN menyatakan sejauh mana kesedaran pengguna menggunakan aplikasi Meditag Checker sebagai salah satu langkah bagi mengelak pengguna tertipu dengan ubat-ubatan import yang tidak berdaftar.

JAWAPAN

Yang di-Pertua,

Semua produk farmaseutikal yang ingin dijual di Malaysia perlu didaftarkan dengan Pihak Berkuasa Kawalan Dadah (PBKD) sebelum boleh dipasarkan kepada pengguna. Ini termasuk produk kesihatan yang dikilangkan dalam negara dan produk yang diimport. Produk berdaftar mempunyai nombor pendaftaran MAL dan pelekat label keselamatan hologram.

Hologram Meditag™ merupakan satu pelekat keselamatan yang telah digunakan bermula tahun 2005 bagi memastikan ketulenan sesuatu produk farmaseutikal. Sehingga kini, aplikasi **Meditag Checker™** telah dimuat turun lebih daripada 10,000 kali oleh pengguna.

Selaras dengan perkembangan sains dan teknologi, bermula 1 September 2019, KKM telah memperkenalkan satu pembaharuan di mana

SOALAN NO : 12

pengguna boleh menyemak ketulenan label keselamatan hologram baharu yang diberi nama **FarmaTagTM** pada produk ubat berdaftar menggunakan aplikasi **Farma CheckerTM**. Aplikasi ini boleh dimuat turun secara percuma dari *Google Playstore* dan *Apple Playstore*.

KKM sentiasa komited untuk terus memperkasakan pengguna mengenai penggunaan ubat secara berkualiti dan selamat dengan mengadakan program kesedaran dan penggunaan aplikasi pintar. Pengguna sentiasa dinasihatkan untuk membeli produk-produk kesihatan yang berdaftar dengan KKM dan mempunyai label keselamatan hologram yang tulen pada produk.

Kementerian juga menjalankan pelbagai usaha pendidikan untuk meningkatkan kesedaran awam mengenai penggunaan produk kesihatan berdaftar melalui pameran, dialog awam, ceramah dan Kempen Kenali Ubat Anda serta “Duta Kenali Ubat Anda” yang telah dijalankan di seluruh negara. Melalui kempen tersebut, maklumat berkaitan produk Kesihatan, kecantikan dan ubat-ubatan berdaftar disampaikan kepada pelbagai golongan masyarakat untuk menyedarkan masyarakat supaya lebih berhati-hati semasa membeli produk kesihatan di pasaran.

Sebarang aduan dan maklumat berkenaan produk-produk kesihatan yang meragukan boleh disalurkan kepada Program Perkhidmatan Farmasi, Kementerian Kesihatan Malaysia melalui laman sesawang <http://www.pharmacy.gov.my> ATAU mana-mana Cawangan Penguatkuasaan Farmasi yang berdekatan melalui talian 03-7841 3200 bagi membantu Kementerian membanteras penjualan produk-produk tidak berdaftar yang boleh memudaratkan bagi melindungi kesihatan dan kesejahteraan orang awam.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK HAJAH AZIZAH BINTI
DATUK SERI PANGLIMA HAJI MOHD
DUN [BEAUFORT]**

TARIKH : 2 DISEMBER 2019 (ISNIN)

SOALAN

Minta **MENTERI PELANCONGAN, SENI DAN BUDAYA** menyatakan :-

- a) apakah perancangan terkini Kementerian untuk memperkasa produk-produk tempatan dari kawasan luar bandar khususnya di negeri Sabah; dan
- b) jenis-jenis program yang telah dirancang untuk menambah baik kemudahan prasarana pelancongan di Sabah.

JAWAPAN

Tuan Yang di-Pertua,

Kementerian Pelancongan, Seni dan Budaya sentiasa berusaha untuk memperkasakan produk-produk tempatan dari kawasan luar bandar khususnya di negeri Sabah. Sehingga Oktober 2019, terdapat seramai 2,131 orang usahawan kraf di Sabah dengan nilai jualan yang telah dijana sebanyak RM41.3 juta. Pelbagai usaha telah dilaksanakan untuk memperkasakan produk kraf tempatan melalui pelaksanaan aktiviti seperti Projek Kraf Komuniti Ku (KKK), Festival Kraf Borneo (FKB) dan Festival Kraf Tekstil Borneo yang bertujuan untuk mempromosikan produk kraf yang dihasilkan oleh usahawan luar bandar kepada pelancong domestik dan antarabangsa.

Selain itu, sehingga kini, sebanyak 30 kluster homestay telah didaftarkan di Negeri Sabah yang terdiri daripada 51 buah kampung dengan penglibatan 406 orang peserta yang menawarkan 716 buah bilik untuk pelancong. Kementerian ini sentiasa menyokong dan membantu peserta-peserta Program Pengalaman Homestay dengan memberikan bantuan seperti berikut:

1. menaik taraf kemudahan guna sama (infrastruktur asas) di perkampungan Homestay yang berdaftar untuk keselesaan dan kepuasan para pelancong yang menginap di homestay;
2. melaksanakan program dan aktiviti homestay dengan kerjasama agensi Kerajaan di bawah Kerajaan Negeri serta di peringkat Persekutuan;
3. menggalakkan para pengusaha homestay menjadi usahawan desa dan terlibat di dalam Industri Kecil dan Sederhana (IKS) seperti perusahaan kraf tangan, makanan dan produk-produk nilai tambah lain untuk meningkatkan lagi pendapatan kepada masyarakat luar bandar;
4. meningkatkan pembangunan keupayaan pengusaha homestay melalui kursus dan latihan bagi memastikan kualiti perkhidmatan

homestay yang optimum diberikan dan menawarkan pakej-pakej homestay yang menarik seperti kursus pembangunan pakej, pemasaran melalui media sosial, pengendalian makanan dan komunikasi dan motivasi homestay; dan

5. menyediakan platform promosi yang melibatkan pengusaha homestay serta meneruskan kempen pengiklanan dan promosi melalui media cetak dan elektronik, seperti laman sesawang Kementerian dan Tourism Malaysia termasuklah melalui media sosial.

Di bawah Rancangan Malaysia KeSebelas (RMKe-11) Kementerian ini telah memperuntukkan sebanyak RM48.5 juta bagi sembilan (9) projek pembangunan pelancongan di Negeri Sabah. Projek-projek tersebut adalah seperti berikut:

1. Projek Peningkatan Kemudahan Pelancongan di Burlington Taman Kinabalu, Ranau, Sabah (RM12 juta) (Projek siap pada 8 Disember 2017);
2. Projek Pembinaan Sistem Saliran Air dan Pembinaan Loji/Kumbahan Najis, Gunung Kinabalu, Taman Kinabalu, Sabah (RM5.4 juta) (Projek siap pada 31 Julai 2019);
3. Projek Peningkatan Kemudahan Pelancongan Kawasan Layang-layang, Gunung Kinabalu, Taman Kinabalu, Ranau, Sabah (RM13.8 juta) (Dalam perancangan);
4. Projek Infrastruktur Edu-Tourism di Pusat Pemuliharaan Gajah Pygmy, Hilir Kinabatangan, Sabah (RM5.7 juta) (Projek dijangka siap pada 12 Disember 2019);
5. Projek Membina Esplanade Bengkoka Pitas, Sabah (RM2.2 juta) (Projek siap pada 23 Julai 2019);

6. Pembangunan Ecotourism di Gomantong, Kinabatangan Sabah (RM5.6 juta) (Dalam perancangan);
7. Pembangunan Ecotourism di Bornean Sunbear Conservation Center di Sepilok, Sandakan, Sabah (RM0.7 juta) (Dalam perancangan);
8. Peningkatan Kemudahan Pelancongan Relokasi Batu Sumpah Peringatan Mengikut Perlembagaan, Keningau, Sabah (Fasa1) (RM0.5 juta) (Projek siap pada 23 April 2018); dan
9. Projek Peningkatan Kemudahan Pelancongan di Rezab Hidupan Liar Tabin Lahad Datu, Sabah (RM2.6 juta) (Projek siap pada 11 Ogos 2016).

Secara umumnya bagi cadangan pembangunan projek pelancongan yang akan datang, Kementerian ini sentiasa bekerjasama dengan Agensi Negeri terutama sekali Kementerian Pelancongan, Kebudayaan dan Alam Sekitar Negeri Sabah (KePKAS) dalam mempertimbangkan sebarang cadangan pembangunan pelancongan domestik dan antarabangsa di Negeri Sabah bagi memastikan produk pelancongan di Malaysia dapat dibangunkan dan dapat memberi manfaat kepada masyarakat tempatan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 2 DISEMBER 2019 (ISNIN)

SOALAN

DATUK WILSON UGAK ANAK KUMBONG [HULU RAJANG] minta **MENTERI KESIHATAN** menyatakan sekiranya pihak Kementerian bercadang untuk:

- a) membina hospital baru di Kapit ; dan
- b) menaik taraf Klinik Kesihatan Sungai Asap dan Belaga.

JAWAPAN

Yang di-Pertua,

Hospital Kapit yang berkapasiti 134 katil merupakan sebuah hospital pakar minor dan telah beroperasi selama hampir 60 tahun. Kadar Penggunaan Katil (Bed Occupancy Rate) bagi tahun 2018 adalah sebanyak 58% dan buat masa ini, KKM belum ada perancangan untuk membina hospital baru di Kapit. Walau bagaimanapun, KKM mengambil maklum akan keperluan untuk menaik taraf Hospital Kapit dari aspek kemudahan infrastruktur termasuk peralatan perubatan untuk meningkatkan kualiti perkhidmatan di hospital ini.

Sehubungan itu, pada tahun 2016, sebanyak empat (4) buah mesin dialisis telah ditambah bagi menampung peningkatan bilangan pesakit yang memerlukan perkhidmatan hemodialisis. Kerja-kerja menaik taraf sistem gas perubatan sedang giat dilaksanakan dan dijangka siap pada

SOALAN NO : 14

hujung tahun ini (2019). Selain itu, KKM juga sedang melaksanakan projek pembinaan sebuah bangunan bagi menempatkan sebuah unit mesin CT-scan yang kini dalam proses tender.

Dalam perancangan jangka panjang pula, KKM bercadang untuk membina sebuah blok baru bagi menempatkan klinik pakar dan wad (termasuk Katil Rawatan Rapi) yang akan dipohon di dalam RMK-12 yang akan datang.

Klinik Kesihatan Sungai Asap pula merupakan sebuah KK jenis 4 dengan kedatangan harian sebanyak 132 pesakit sehari. Bagi meningkatkan lagi perkhidmatan kesihatan, KK Sungai Asap telah dinaik taraf menjadi Klinik Kluster di Daerah Belaga pada tahun 2018. Sehubungan itu, sebanyak RM700,000 telah diperuntukkan untuk pembelian peralatan perubatan. Selain itu, bilangan pegawai perubatan juga turut ditambah. KKM juga sedang di dalam perancangan untuk mewujudkan perkhidmatan pergigian di KK sedia ada dan cadangan pelaksanaannya akan dipohon dalam RMK-12 yang akan datang.

Klinik Kesihatan Belaga adalah sebuah KK jenis 4 yang dilengkapi kemudahan wad pemerhatian (20 katil), kemudahan x-ray, makmal, unit kecemasan, rawatan pesakit luar dan perkhidmatan kesihatan ibu dan anak. Dengan kedatangan harian seramai 82 orang, KK Belaga masih lagi mampu menampung keperluan penduduk setempat. Buat masa ini, KKM belum ada perancangan untuk menaik taraf KK ini. Walaubagaimanapun, keperluan ini akan dikaji dari semasa ke semasa dan sekiranya ada keperluan, akan dilaksanakan di masa hadapan.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT , MESYUARAT KETIGA
PENGAL KEDUA, PARLIMEN KEEMPAT BELAS**

PERTANYAAN : LISAN

DARIPADA : DATO' MANSOR OTHMAN [NIBONG TEBAL]

TARIKH : 2 DISEMBER 2019 (ISNIN)

SOALAN

Minta **MENTERI PEMBANGUNAN USAHAWAN** menyatakan secara terperinci program TEKUN Mobile Mart dan bagaimana program ini dapat membantu usahawan tempatan khususnya di kalangan usahawan TEKUN.

JAWAPAN

Tuan Yang Dipertua,

1. Selaras dengan perkembangan perniagaan dan dengan matlamat untuk memasarkan dan membantu usahawan serta orang awam, TEKUN telah mengambil inisiatif untuk mengadakan jualan barangan keperluan harian melalui jualan bergerak. Untuk itu, TEKUN Mart Mobile telah dilancarkan pada 21 Ogos 2019, oleh Menteri Pembangunan Usahawan, YB. Dato' Seri Mohd Redzuan bin Md Yusuf.
2. TEKUN Corporation dan Koperasi Rakan TEKUN Berhad, adalah anak syarikat dan koperasi di bawah naungan/ selain pihak TEKUN Nasional yang telah diberi tanggungjawab untuk melaksanakan program ini. Usahasama TEKUN Corporation dan Koperasi Rakan TEKUN Berhad ini telah memperkenalkan program berkonsepkan pasar mini bergerak iaitu TEKUN Mart Mobile yang kini beroperasi menggunakan dua (2) buah lori berkapasiti 3 tan untuk barangan runcit kering dan lori berkapasiti 1 tan untuk menjual barangan basah.

3. Objektif pelaksanaan ini adalah untuk mengurangkan beban kos sara hidup pengguna, memasarkan produk-produk usahawan TEKUN secara terus tanpa orang tengah dan mendekati pengguna menggunakan konsep kedai bergerak.
4. Pelaksanaan program ketika ini merupakan projek rintis dalam mendapatkan keberhasilan model perniagaan yang berjaya dan boleh dilaksanakan oleh usahawan pada 2020. Pihak TEKUN sedang meneliti keberkesanan program ini untuk mengenalpasti impak yang dihasilkan kepada usahawan juga termasuk impak kepada pengurangan kos sara hidup rakyat. Program ini dijangka akan digunakan sebagai model perniagaan dan akan diperluaskan kepada usahawan untuk menjalankan model perniagaan yang sama dengan bantuan pembiayaan dari TEKUN.
5. Melalui inisiatif ini, harga barangan akan dijual dengan harga yang lebih rendah antara 10% hingga 15% berbanding harga pasaran semasa. Barangan yang dibekalkan adalah dalam segmen makanan sejuk beku, barangan basah, makanan kering/berproses dan juga minuman. Selain daripada produk usahawan, TEKUN juga akan mendapatkan barang jualan daripada pemborong/pengimport untuk barangan keperluan asas seperti bawang, cili kering dan ikan bilis dengan matlamat supaya harga jualan tersebut adalah jauh lebih rendah dari harga pasaran.
6. Sehingga kini, sebanyak **332 produk** telah dipasarkan melalui konsep TEKUN Mart Mobile ini, di mana sebanyak 40% adalah daripada produk usahawan TEKUN. Pihak TEKUN juga dalam proses untuk meningkatkan lagi produk usahawan TEKUN dari masa ke semasa.
7. Melalui pelaksanaan program ini, secara tidak langsung produk usahawan TEKUN akan dapat dipasarkan secara meluas tanpa perlu mengeluarkan kos tambahan bagi aktiviti promosi dan mengatasi masalah kesukaran memasarkan produk di pasaraya-pasaraya besar.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB DATO' HASBULLAH BIN OSMAN
KAWASAN : GERIK
TARIKH : 02 DISEMBER 2019 (ISNIN)

SOALAN :

YB DATO' HASBULLAH BIN OSMAN minta **MENTERI KERJA RAYA** menyatakan perancangan menaik taraf jalan raya Timur Barat yang menghubungkan Gerik dengan Jeli. Ini disebabkan jalan utama yang mengalami kerosakan yang membimbangkan sehingga menyebabkan berlaku kemalangan melibatkan kehilangan nyawa. Keadaan jalan yang berlubang yang tidak dibaiki juga mengakibatkan kerosakan pada kenderaan. Ini merupakan jalan penghubungan antara pantai barat dan pantai timur dan bilakah penyelenggaraan yang sepenuhnya dibuat untuk jalan berkenaan sebelum ini.

JAWAPAN :

Tuan Yang Di-Pertua,

Untuk makluman Ahli Yang Berhormat, Jalan Persekutuan yang dimaksudkan merupakan laluan Persekutuan **FT004** iaitu **Jalan Baling-Gerik-Jeli** (atau dikenali sebagai Lebuhraya Timur – Barat). Laluan ini menghubungkan tiga (3) negeri iaitu Kedah, Perak dan Kelantan. Jumlah **keseluruhan panjang** laluan ini adalah sepanjang **292.39 km**. Di Negeri **Perak**, laluan ini bermula di **Seksyen 83.740** yang bersempadanan dengan Negeri Kedah dan melalui beberapa kawasan termasuk kawasan Parlimen Gerik dan seterusnya berakhir di sempadan Negeri Kelantan iaitu di Jeli di **Seksyen 198.400** iaitu sepanjang **114.660 km**.

Tuan Yang Di-Pertua,

Berdasarkan Laporan Kemalangan Jalan Raya oleh Polis DiRaja Malaysia (POL27), jumlah kemalangan yang direkodkan bagi tempoh tahun 2018 sehingga Jun 2019 ialah sebanyak **36 kemalangan** jalan raya di laluan FT004 iaitu Jalan Gerik ke Jeli dalam kawasan Daerah Hulu Perak. Daripada jumlah tersebut, sebanyak **15 kejadian kemalangan dikategorikan sebagai parah atau maut**. Walau bagaimanapun, didapati **punca** kejadian kemalangan ini adalah disebabkan oleh **faktor manusia (kecuaian pemandu)** dan **bukannya disebabkan keadaan jalan raya**.

Untuk makluman Ahli Yang Berhormat, jumlah peruntukan yang telah diperuntukkan bagi melaksanakan program penyenggaraan Jalan Persekutuan di Daerah Hulu Perak adalah sebanyak **RM6.35 juta** bagi tempoh bulan **Januari – Ogos 2019**. Daripada jumlah tersebut, sebanyak **RM1.81 juta** telah diagihkan untuk program penyenggaraan di laluan **FT004**.

Untuk makluman Ahli Yang Berhormat juga, bagi memastikan jalan-jalan yang rosak dapat dibaiki segera, Kementerian Kerja Raya telah melantik Syarikat konsesi melalui perjanjian penswastan di bawah skop Kerja Penyelenggaraan Rutin, Syarikat konsesi perlu melakukan rondaan Pemeriksaan Rutin di jalan-jalan Persekutuan dengan kekerapan 2 kali seminggu. Ini adalah untuk memastikan jika terdapat sebarang kerosakan jalan seperti jalan berlubang, kerja tampalan lubang hendaklah dilaksanakan dalam tempoh 24 jam selaras dengan dasar Kementerian Kerja Raya iaitu dasar sifar lubang atau '*zero pothole*' di Jalan Persekutuan di seluruh negara mulai bulan Februari 2016. Dasar ini menetapkan supaya lubang jalan perlu ditampal atau diambil tindakan oleh Syarikat Konsesi dalam tempoh kurang daripada 24 jam. Penalti akan dikenakan terhadap syarikat konsesi sekiranya tindakan yang diambil melebihi dari tempoh tindakan yang ditetapkan. Kerja penampalan lubang ini merupakan langkah awal atau kaedah pencegahan atau *preventive* bagi tujuan keselamatan pengguna jalan raya sebelum kerja-kerja turapan kekal dilaksanakan.

Selain itu, Kementerian Kerja Raya juga menyediakan program penyelenggaraan turapan berdasarkan notis kerosakan (*Notice of Defects / NOD*) yang disediakan oleh Syarikat Konsesi Penyelenggaraan Jalan Persekutuan. Melalui NOD ini, Kementerian Kerja Raya akan menyenaraikan program penyelenggaraan turapan mengikut keutamaan dan keperluan mendesak untuk dikemukakan kepada Kementerian Kewangan Malaysia bagi tujuan kelulusan peruntukan.

Walau bagaimanapun, pelaksanaan program penyelenggaraan ini adalah tertakluk kepada kelulusan peruntukan dari Kementerian Kewangan. Kementerian Kerja Raya sentiasa komited untuk melaksanakan program penyelenggaraan jalan di Jalan Persekutuan terutamanya penyelenggaraan turapan serta memastikan dari semasa ke semasa semua Jalan Persekutuan sentiasa berada dalam keadaan selamat dan selesa untuk digunakan. Sekian, terima kasih.

**PEMBERITAHUAN PERTANYAAN LISAN
DEWAN RAKYAT, MESYUARAT KETIGA,
PENGAL KEDUA, PARLIMEN KEEMPAT BELAS**

PERTANYAAN : LISAN

**DARIPADA : PUAN JUNE LEOW HSIAD HUI
[HULU SELANGOR]**

TARIKH : 2 DISEMBER 2019 (ISNIN)

SOALAN

Minta **MENTERI PEMBANGUNAN USAHAWAN** menyatakan perancangan Kementerian bagi membangunkan industri Aeroangkasa di negara ini bagi membuka lebih banyak peluang keusahawanan.

JAWAPAN

Yang di-Pertua,

1. Kementerian Pembangunan Usahawan (MED) telah menjalankan beberapa inisiatif di dalam usaha memantapkan pembangunan industri Aeroangkasa di Malaysia. Pihak Kementerian melalui agensinya, SME Corp. Malaysia telah melaksanakan Program "*Aerospace Manufacturing Initiative : Developing SMEs in Global Aerospace Manufacturing Industry (AMI)*" yang bertujuan membangunkan Perusahaan Kecil dan Sederhana (PKS) tempatan menjadi sebahagian daripada rantai bekalan industri Aeroangkasa global.
2. Pelaksanaan program ini selaras dengan Dasar Keusahawanan Negara (DKN) yang memfokuskan industri Aeroangkasa sebagai *game changer* yang akan memacu ekonomi negara ke tahap yang lebih tinggi. Program AMI ini juga selaras dengan Pelan Induk Industri Aeroangkasa dengan aspirasi menjadikan Malaysia sebagai hab pengilang peralatan Aeroangkasa di Asia Tenggara pada 2030.
3. PKS yang dikenalpasti di bawah Program AMI ini diberi bantuan dalam bentuk pembangunan kapasiti serta bantuan kewangan bagi meningkatkan keupayaan masing-masing. Tiga (3) elemen penting di bawah kerangka pelaksanaan Program AMI adalah:
 - i. Transformasi Organisasi – menambahbaik pengurusan dalaman PKS terlibat terutamanya di dalam pengurusan sistem kualiti syarikat, pengubahsuaian prosedur dan peningkatan pengurusan proses pembuatan; selaras dengan piawaian ketat di dalam industri Aeroangkasa
 - ii. Strategi Pemasaran - membangunkan strategi pemasaran PKS terutama penglibatan di dalam pameran dan persidangan antarabangsa bagi mendedahkan PKS tentang selok belok pasaran Aeroangkasa di peringkat global.

- iii. Roadmap Teknologi – Peningkatan penggunaan teknologi terkini oleh PKS terpilih; selaras dengan pelaksanaan aplikasi Industri 4.0 di dalam industri Aeroangkasa

4. Sehingga bulan September 2019, sebanyak tiga puluh (30) PKS telah menyertai Program AML di bawah SME Corp. Hasil daripada program ini sangat menggalakkan dengan jumlah jualan sebanyak RM58.9 juta dijana, manakala Permintaan untuk Cadangan (RFP) dari syarikat *Tier-1* dan *Tier-2* pada tahun 2017 dan 2018 mencapai 1,281 permohonan. Selain itu, PKS terlibat telah memperoleh pensijilan sistem pengurusan kualiti yang diperlukan seperti persijilan AS9100 untuk memenuhi syarat menjadi pengeluar sumber komponen Aeroangkasa.

5. Pada masa ini Kementerian telah menyenaraikan sektor Aeroangkasa sebagai salah satu sektor untuk dibangunkan di bawah Program Pembangunan Vendor (PPV) untuk mewujudkan ekosistem industri Aeroangkasa yang akan melibatkan lebih banyak usahawan dan vendor-vendor tempatan berpeluang untuk meneroka pasaran perniagaan berskala sederhana dan besar termasuk sebagai vendor kepada syarikat Aeroangkasa berpengaruh di dunia seperti Boeing, Airbus, Bombardier dan banyak lagi.

Sekian, terima kasih.

**MESYUARAT KETIGA, PENGGAL KEDUA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : DATUK ALEXANDER NANTA LINGGI [KAPIT]

TARIKH : 2.12.2019 (ISNIN)

SOALAN

minta **MENTERI PEMBANGUNAN LUAR BANDAR** menyatakan sama ada Kementerian ini akan terus dengan cadangan melantik pengerusi JKKK atau Tuai Rumah untuk kampung-kampung dan rumah-rumah panjang di Sarawak mulai Januari tahun 2020.

JAWAPAN

Tuan Yang di-Pertua,

Untuk makluman Yang Berhormat, pelantikan JKKK dan Tuai Rumah untuk kampung-kampung dan rumah-rumah panjang di Sarawak adalah bidang kuasa Kerajaan Negeri Sarawak. Kementerian Pembangunan Luar Bandar tidak berhasrat untuk untuk mencampuri urusan berkenaan.

Walau bagaimanapun, bagi memastikan institusi pentadbiran di peringkat kampung dapat melaksanakan fungsi dengan berkesan, Jemaah Menteri dalam mesyuarat pada 18 Oktober 2019 telah bersetuju dengan cadangan penubuhan Majlis Pengurusan Komuniti Kampung Persekutuan (MPKKP) di negeri yang tidak ditadbir oleh Kerajaan Persekutuan termasuk di Sarawak.

Ia bertujuan untuk:

- (i) membantu Kerajaan Persekutuan di negeri berkaitan untuk merancang pembangunan di peringkat kampung;
- (ii) menyalurkan maklumat keperluan pembangunan masyarakat kampung kepada Kerajaan Persekutuan;
- (iii) menyampaikan maklumat, memberi penjelasan dan merealisasikan dasar-dasar Kerajaan Persekutuan hingga ke peringkat akar umbi; dan
- (iv) merancang dan melaksana program di kampung melalui permohonan Geran yang disediakan.

MPKKP yang dilantik ini akan melaksanakan tugas-tugas yang berkaitan dengan fungsi Kerajaan Persekutuan. Urusan-urusan yang melibatkan Kerajaan Negeri akan masih lagi dilaksanakan oleh JKKK lantikan Kerajaan Negeri Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. PUAN MARIA CHIN BINTI ABDULLAH
[PETALING JAYA]
TARIKH : 02 DISEMBER 2019 (ISNIN)

SOALAN NO. 19

Y.B. PUAN MARIA CHIN BINTI ABDULLAH [PETALING JAYA] minta **MENTERI KEWANGAN** menyatakan sama ada Kerajaan boleh mengkaji insentif cukai kepada syarikat yang menerima ibu yang ingin kembali bekerja setelah bersalin untuk menggalakkan penyertaan tenaga kerja wanita dalam sektor swasta.

JAWAPAN

Tuan Yang di-Pertua,

Untuk makluman Ahli Yang Berhormat, seperti yang diumumkan dalam Belanjawan 2020 pada 11 Oktober 2019, Kerajaan telah bersetuju melanjutkan permohonan galakan cukai kepada golongan wanita yang kembali bekerja setelah berhenti kerja secara sementara (*career break*) sehingga 31 Disember 2023. Galakan ini disediakan kepada wanita yang telah berhenti kerja untuk tempoh sekurang-kurangnya 2 tahun atas sebab-sebab seperti menjaga ibu bapa atau anak. Galakan cukai pendapatan yang disediakan ialah pengecualian cukai pendapatan sepenuhnya ke atas penggajian yang diterima wanita tersebut untuk tempoh maksimum 12 bulan berturut-turut.

Galakan cukai ini boleh dipertimbangkan kepada wanita yang ingin kembali bekerja setelah bersalin dengan syarat perlu mematuhi keperluan insentif seperti telah berhenti sepenuhnya (terputus hubungan majikan – pekerja) untuk tempoh sekurang-kurangnya 2 tahun.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK SERI DR. ADHAM BIN BABA
[TENGGARA]
TARIKH : 02 DISEMBER 2019 (ISNIN)

SOALAN NO. 20

Y.B. DATUK SERI DR. ADHAM BIN BABA [TENGGARA] minta **MENTERI KEWANGAN** menyatakan apakah langkah Kerajaan sekarang agar ekonomi negara dapat diurus dengan baik dan meningkatkan kadar KDNK negara kepada yang lebih tinggi, stabil dan mantap serta apakah sumbangan rakyat dari sektor awam serta swasta terhadap gesaan ini.

JAWAPAN

Tuan Yang di-Pertua,

Ekonomi Malaysia kekal berdaya tahan dengan mencatat pertumbuhan 4.6% dalam tempoh 9 bulan pertama 2019, meskipun dalam persekitaran ekonomi global yang semakin mencabar berikutan konflik perdagangan yang berpanjangan, ketegangan geopolitik serta volatiliti dalam pasaran komoditi dan kewangan global. Asas ekonomi yang mapan termasuk kadar pengangguran serta inflasi yang rendah, rizab antarabangsa yang tinggi, dan sistem kewangan yang kukuh. Diversifikasi perdagangan yang luas dari segi destinasi dan produk turut membantu meningkatkan daya tahan ekonomi negara.

Tuan Yang di-Pertua,

Kerajaan melalui Belanjawan 2020 telah mengumumkan pelbagai inisiatif dan strategi untuk merangsang pelaburan dan perbelanjaan domestik. Inisiatif ini termasuk:

- menyediakan persekitaran kondusif bagi menarik pelaburan asing dan domestik;
- meningkatkan peluang pekerjaan seperti melalui program #MalaysiaKerja dengan kos RM6.5 bilion untuk 5 tahun;
- memodenkan pasaran buruh;
- menambah baik kualiti pendidikan dan latihan; dan
- meningkatkan potensi ekonomi digital demi memacu pertumbuhan ekonomi masa hadapan seperti dengan Pelan Gentian Optik Dan Kesalinghubungan Negara dengan pelaburan bernilai RM21.6 bilion dari tahun 2019 sehingga 2023.

Di samping itu, Kerajaan akan terus memberi penekanan kepada pembaharuan institusi dan amalan tadbir urus baik dalam pengurusan dasar fiskal

NO SOALAN : 20

berdasarkan prinsip Kecekapan, Akauntabiliti dan Ketelusan bagi memperkukuh kewangan awam. Tindakan ini termasuk menambah baik proses belanjawan berasaskan sifar serta memperkemas proses tender terbuka.

Pembaharuan institusi ini telah pun menjadikan Malaysia antara negara yang mengalami peningkatan markah yang terbesar di kalangan 214 ekonomi menurut *Worldwide Governance Indicators* (WGI) yang terbaharu yang diterbitkan oleh Bank Dunia pada Oktober 2019. Pencapaian ini akan membantu Kerajaan mengekalkan penarafan kredit berdaulat Malaysia pada paras A3 atau A- dengan unjuran stabil.

Kesemua langkah yang dilaksanakan oleh Kerajaan ini merupakan asas yang penting untuk menjayakan aspirasi Wawasan Kemakmuran Bersama 2030 iaitu peningkatan taraf hidup rakyat dan perpaduan dalam kepelbagaian bangsa dan budaya seiring dengan peningkatan pertumbuhan ekonomi negara. Justeru, rakyat perlu bersama-sama menghayati dan menggembeleng tenaga demi menjayakan aspirasi yang digariskan dalam Wawasan ini.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN WILLIAM LEONG JEE KEEN
[SELAYANG]
TARIKH : 02 DISEMBER 2019 (ISNIN)

SOALAN NO. 21

Y.B. TUAN WILLIAM LEONG JEE KEEN [SELAYANG] minta **MENTERI KEWANGAN** menyatakan langkah Kerajaan bagi mengekalkan prestasi ekonomi yang baik supaya agensi penarafan kredit antarabangsa terus menaruh keyakinan terhadap Malaysia.

JAWAPAN

Tuan Yang di-Pertua,

Kerajaan mengambil langkah proaktif untuk mengekalkan penarafan kredit antarabangsa Malaysia. Langkah konsolidasi fiskal sedang diteruskan bagi memastikan kedudukan kewangan Kerajaan kukuh dan mampan dalam tempoh jangka masa sederhana dan panjang. Defisit fiskal dijangka terus berkurang kepada 3.4% berbanding KDNK pada 2019 dan 3.2% pada 2020, daripada 3.7% pada 2018.

Kerajaan melalui Belanjawan 2020 telah mengumumkan pelbagai inisiatif dan strategi untuk merangsang pelaburan dan perbelanjaan domestik. Inisiatif ini termasuk menyediakan persekitaran kondusif bagi menarik pelaburan asing dan domestik; meningkatkan peluang pekerjaan seperti melalui program #MalaysiaKerja dengan kos RM6.5 bilion untuk 5 tahun; memodenkan pasaran buruh; menambah baik kualiti pendidikan dan latihan; dan meningkatkan potensi ekonomi digital demi memacu pertumbuhan ekonomi masa hadapan seperti dengan Pelan Gentian Optik Dan Kesalinghubungan Negara dengan pelaburan bernilai RM21.6 bilion dari tahun 2019 sehingga 2023. Usaha Kerajaan ini akan memberi kesan positif kepada pertumbuhan ekonomi negara pada 2019 dan 2020.

Selain daripada pertumbuhan ekonomi yang kukuh dan pengurusan fiskal yang cekap, penarafan kredit berdaulat Malaysia juga dipengaruhi oleh faktor institusi yang diukur oleh Bank Dunia melalui *Worldwide Governance Indicators* (WGI). Dalam WGI yang terbaharu yang diterbitkan pada bulan Oktober 2019, Malaysia merupakan antara negara yang mengalami peningkatan markah yang terbesar di kalangan 214 ekonomi. Prestasi Malaysia yang memberangsangkan ini adalah hasil daripada pembaharuan institusi yang sedang dilaksanakan oleh Kerajaan. Pencapaian ini akan membantu Kerajaan mengekalkan penarafan kredit berdaulat Malaysia pada paras A3 atau A-dengan unjuran stabil.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TAN SRI NOH BIN HAJI OMAR
[TANJONG KARANG]**

TARIKH : 2 DISEMBER 2019 [ISNIN]

SOALAN

Minta **MENTERI PERUMAHAN DAN KERAJAAN TEMPATAN** menyatakan berapakah harga rumah PPR yang baru dan berapa jumlah subsidi yang diberi.

JAWAPAN

Tuan Yang di-Pertua,

1. Untuk makluman Yang Berhormat, rumah Program Perumahan Rakyat (PPR) sehingga kini dijual dengan harga RM35,000 seunit di Semenanjung dan RM42,000 di Sabah dan Sarawak. Dalam hal ini, Kerajaan terpaksa menanggung penyediaan subsidi hampir mencecah RM150,000 bagi seunit rumah. Oleh yang demikian, **Kementerian Perumahan dan Kerajaan Tempatan (KPKT)** berpandangan harga jualan tersebut perlu dinilai semula dan penyediaan subsidi yang tinggi di pihak Kerajaan adalah amat membebankan untuk jangka masa panjang.

2. Sehubungan itu, KPKT bercadang untuk menjenamakan semula Program Perumahan Rakyat (PPR) kepada Program Perumahan Malaysia (PPM).

3. **Cadangan penetapan harga jualan seunit rumah** bagi Program Perumahan Malaysia (PPM) adalah berdasarkan kepada **harga rumah mampu milik mengikut median pendapatan penduduk setempat di setiap negeri** serta harga jualan adalah **di bawah RM300,000 seunit** selaras dengan Dasar Perumahan Mampu Milik Negara (DRMM). Walau bagaimanapun perkara ini masih dalam tindakan Kementerian dan belum dimuktamadkan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 2 DISEMBER 2019 (ISNIN)

SOALAN

DATUK ROZMAN BIN ISLI [LABUAN] minta **MENTERI KESIHATAN** menyatakan apakah Kementerian merancang untuk menaik taraf Hospital Labuan menjadi Hospital Pakar Major memandangkan Labuan adalah pusat minyak dan gas dan pusat kewangan antarabangsa.

JAWAPAN

Yang di-Pertua,

Kementerian Kesihatan Malaysia (KKM) sentiasa berusaha untuk memberikan perkhidmatan kesihatan yang terbaik kepada seluruh rakyat Malaysia melalui kemudahan yang ada di fasiliti kesihatan Kerajaan. Pada masa sekarang, Hospital Labuan adalah merupakan sebuah Hospital Pakar Minor yang mempunyai kapasiti sebanyak 109 buah katil, di mana hospital ini menawarkan sejumlah sepuluh (10) bidang kepakaran yang disasarkan bagi Hospital Pakar Minor. Bidang-bidang tersebut adalah:

- a) Perubatan Am;
- b) Pembedahan Am;
- c) Pediatrik;
- d) Obstetrik dan Ginekologi;
- e) Ortopedik;
- f) Anestesiologi;
- g) Perubatan Kecemasan;

- h) Psikiatri;
- i) Radiologi; dan
- j) Patologi.

Di samping itu juga, Hospital Labuan juga mendapat perkhidmatan lawatan pakar secara berkala dalam pelbagai bidang seperti:

- a) Oftalmologi - sebulan sekali;
- b) Pembedahan Neuro - sebulan sekali;
- c) Otorinolaringologi - setiap 2 bulan;
- d) Gastrologi - setiap 2 bulan;
- e) Nefrologi - setiap 3 bulan;
- f) Hematologi - setiap 4 bulan;
- g) Respiratori - setiap 4 bulan;
- h) Pembedahan Payudara dan Endokrinologi - setiap 4 bulan;
- i) Rehabilitasi - setiap 4 bulan;
- j) Pembedahan Plastik - setiap 4 bulan;
- k) Pembedahan Pediatrik - setiap 4 bulan;
- l) Pediatrik Neurologi - setiap 4 bulan;
- m) Pediatrik Kardiologi - setiap 4 bulan; dan
- n) Pediatrik Nefrologi - setiap 4 bulan.

Buat masa ini, tiada perancangan untuk menaik taraf Hospital Labuan menjadi sebuah Hospital Pakar Major. Namun begitu, KKM akan sentiasa berusaha menaik taraf perkhidmatan yang diberikan di hospital tersebut pada masa akan datang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI FADILLAH BIN YUSOF
[PETRAJAYA]**

TARIKH : 2 DISEMBER 2019 [ISNIN]

SOALAN

Minta **MENTERI PERUMAHAN DAN KERAJAAN TEMPATAN** menyatakan keberkesanan langkah-langkah yang diambil Kementerian selama ini bagi membantu rakyat terutamanya generasi muda dalam memiliki rumah.

JAWAPAN

Tuan Yang di-Pertua,

1. Untuk makluman Yang Berhormat, Kerajaan melalui Kementerian Perumahan dan Kerajaan Tempatan (KPKT) menyediakan dasar perumahan secara menyeluruh kepada semua golongan terutamanya kumpulan B40 dan M40 dalam meningkatkan kemudahan dan akses kepada pemilikan rumah mampu milik. Kemudahan ini turut meliputi golongan anak muda yang memenuhi kriteria dan syarat yang telah ditetapkan.

2. Keberkesanan usaha-usaha Kerajaan yang telah dibuat adalah berdasarkan pencapaian bagi setiap program/inisiatif yang dilaksanakan seperti berikut:

- i. **Penyediaan 1 Juta Rumah Mampu Milik (RMM)** dalam tempoh 10 tahun di seluruh negara sebagaimana Manifesto Pakatan Harapan melalui agensi-agensi pelaksana seperti KPKT, lain-lain Kementerian, Kerajaan Negeri dan pihak swasta. Sebanyak 39,864 unit rumah mampu milik telah disiapkan dalam tempoh Julai 2018 hingga 30 Jun 2019.
- ii. **FundMyhome – Depositku** - konsep di mana rakyat boleh mendapatkan bantuan kewangan untuk membeli rumah melalui kaedah pinjaman terbuka. Pembeli cuma perlu membayar 20% daripada harga rumah manakala baki 80 % akan di sumbang oleh pembiaya yang terlibat dan pulangan akan dikongsi bersama pada masa hadapan. Berdasarkan permohonan yang diterima di KPKT, sehingga Oktober 2019, seramai 24 pemohon telah menerima manfaat daripada program ini yang mula dilancarkan pada tahun ini.
- iii. **Skim Perumahan Mampu Milik Swasta** - merupakan salah satu langkah kerajaan untuk menggalakkan sektor swasta membina lebih banyak rumah mampu milik. Skim ini menawarkan insentif sehingga RM30,000 seunit yang memberi faedah kepada pembeli-pembeli rumah dan pemaju-pemaju swasta. Sehingga Oktober 2019, sebanyak RM17.85 juta telah diperuntukkan yang melibatkan seramai 595 penerima insentif.

3. Kesimpulannya, inisiatif-inisiatif yang dilaksanakan oleh Kerajaan ini dapat membantu memastikan setiap rakyat terutamanya bagi golongan B40 dan M40 termasuklah golongan anak muda yang berkecukupan mampu memiliki rumah berkualiti. Sekian, terima kasih.

**MESYUARAT KETIGA, PENGGAL KEDUA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 2.12.2019 (ISNIN)

SOALAN

minta **MENTERI PEMBANGUNAN LUAR BANDAR** menyatakan adakah Kementerian berhasrat untuk mewujudkan lebih banyak rumah mampu milik di kawasan luar bandar khususnya di daerah Segamat.

JAWAPAN

Tuan Yang di-Pertua,

Program rumah mampu milik peringkat nasional adalah diselaraskan oleh Kementerian Perumahan dan Kerajaan Tempatan. Walau bagaimanapun, pelaksanaan program rumah mampu milik di bawah Kementerian Pembangunan Luar Bandar ada disediakan melalui Lembaga Kemajuan Wilayah mengikut liputan wilayah masing-masing.

Bagi Negeri Johor, sebanyak 454 projek pembangunan rumah mampu milik dilaksanakan oleh Lembaga Kemajuan Johor Tenggara (KEJORA) pada tahun 2018, manakala sebanyak 136 buah rumah disasarkan pada tahun 2019 di wilayah KEJORA. Daerah Segamat tidak termasuk di dalam wilayah KEJORA dan tiada projek rumah mampu milik di kawasan berkenaan yang dilaksanakan oleh agensi tersebut.

Kementerian Pembangunan Luar Bandar turut menyediakan program bantuan rumah PPRT melibatkan projek baik pulih dan bina baharu khusus kepada kumpulan sasar miskin dan miskin tegar yang layak di seluruh negara. Kos pembinaan atau pembaikan di bawah program ini ditanggung sepenuhnya oleh Kerajaan.

Sebanyak RM7.7 juta telah diperuntukkan untuk bantuan rumah PPRT di negeri Johor melibatkan pelaksanaan 50 unit bina baharu dan 312 unit baik pulih. Bagi daerah Segamat, sebanyak RM265 ribu diperuntukkan untuk pelaksanaan 3 unit bina baharu dan 10 unit baik pulih.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK ZAHIDI BIN ZAINUL ABIDIN
[PADANG BESAR]**

TARIKH : 2 DISEMBER 2019 (ISNIN)

SOALAN

DATUK ZAHIDI BIN ZAINUL ABIDIN minta **MENTERI KESIHATAN** menyatakan :-

- a) apakah status terkini pembinaan Hospital Padang Besar yang telah pun diluluskan bajetnya dalam RMK-11; dan
- b) adakah proses tender dan pemilihan kontraktor telah pun diselesaikan.

JAWAPAN

Yang di-Pertua,

Kementerian Kesihatan Malaysia (KKM) mengambil maklum tentang cadangan pembinaan Hospital Padang Besar, Perlis berkapasiti 108 katil dengan anggaran kos sebanyak RM200 juta. Walau bagaimanapun, Kementerian Hal Ehwal Ekonomi (MEA) melalui surat bertarikh 24 Oktober 2018 telah memaklumkan kepada KKM bahawa projek pembinaan Hospital Padang Besar, Perlis telah dibatalkan oleh Kerajaan. Cadangan pembinaan projek Hospital Padang Besar, Perlis ini mungkin boleh dipertimbangkan pada masa akan datang berdasarkan keutamaan projek dan kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN STEVEN CHOONG SHIAU YOON
[TEBRAU]
TARIKH : 02 DISEMBER 2019 (ISNIN)

SOALAN NO. 27

Y.B. TUAN STEVEN CHOONG SHIAU YOON [TEBRAU] minta **MENTERI KEWANGAN** menyatakan bilakah AAkta Cukai Pendapatan tahun 1967 dan Akta Cukai Harta Tanah 1976 akan :-

(a) dikemaskinikan dengan dasar percukaian yang lebih munasabah dan mesra rakyat memandangkan proses perniagaan telah banyak berubah sejak tahun 1967 ; dan

(b) dikaji semula khususnya untuk mengelakkan keuntungan/peningkatan nilai harta tanah tidak dikenakan cukai dua kali, satu di bawah Akta Cukai Pendapatan sebagai pemaju dan satu lagi di bawah Akta Cukai Keuntungan Harta Tanah jika berlaku jual-beli syer syarikat pemaju tersebut dan adakah akan digubal semula memandangkan banyak pindaan kecil telah dimasukkan yang memerlukan penomboran perenggan semula untuk melengkapkan Akta tersebut .

JAWAPAN

Tuan Yang di-Pertua,

- a. Untuk makluman Ahli Yang Berhormat, Kerajaan sentiasa mengemaskini dan meminda dasar percukaian di bawah Akta Cukai Pendapatan 1967 dan akta-akta berkaitan percukaian sedia ada melalui pindaan Rang Undang-Undang Kewangan yang dibahaskan di Parlimen. Pindaan yang dibuat adalah bagi memastikan perundangan percukaian di Malaysia sentiasa dikemaskini dan seiring dengan standard percukaian antarabangsa (*international agreed tax standard*) selain memperkemaskan kecekapan sistem percukaian negara agar kutipan hasil negara selari dengan perkembangan model perniagaan terkini dan pertumbuhan ekonomi semasa; dan
- b. Cukai Keuntungan Harta Tanah (CKHT) dikenakan ke atas keuntungan yang diperoleh bagi penjualan atau pelupusan harta tanah. Bagi syarikat pembangunan hartanah, hasil keuntungan dari penjualan perumahan dan bangunan komersial merupakan pendapatan perniagaan yang tertakluk kepada cukai pendapatan di bawah seksyen 4(a) Akta Cukai Pendapatan 1967. Sekiranya perolehan harta tanah adalah bagi tujuan pelaburan jangka masa panjang dan tidak berniat untuk dilupuskan dalam tempoh yang singkat, hasil keuntungan dari pelupusan hartanah tersebut adalah dicukaikan di bawah Akta Cukai Keuntungan Harta Tanah 1976. CKHT juga dikenakan ke atas keuntungan daripada pelupusan saham dalam syarikat harta tanah. Syarikat harta tanah adalah syarikat terkawal yang memiliki harta tanah atau memegang saham dalam lain-lain syarikat harta tanah sebagai aset utamanya yang tidak kurang dari 75% daripada nilai keseluruhan harta ketara. Bagi transaksi jual beli saham dalam syarikat pemaju, CKHT akan dikenakan kepada pemegang saham ke atas keuntungan daripada pelupusan saham jika syarikat pemaju tersebut adalah syarikat harta tanah yang tertakluk kepada perenggan 34A Jadual 2 Akta Cukai Keuntungan Harta Tanah 1976.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK SERI HAJI AHMAD BIN HAMZAH
[JASIN]
TARIKH : 02 DISEMBER 2019 (ISNIN)

SOALAN NO. 28

Y.B. DATUK SERI HAJI AHMAD BIN HAMZAH [JASIN] minta **MENTERI KEWANGAN** menyatakan:-

- (a) apakah strategi Kerajaan bagi memperkukuhkan nilai Ringgit Malaysia ;
dan
- (b) pertimbangan dan inisiatif yang diambil oleh Bank Negara untuk campur tangan dalam penentuan nilai mata wang ringgit .

JAWAPAN

Tuan Yang di-Pertua,

Pada 7 November 2019, nilai ringgit telah mengukuh sebanyak 0.2% manakala pada 29 November 2019, nilai ringgit telah menyusut sebanyak 0.9%. Ini menunjukkan volatiliti perubahan nilai mata wang dalam keadaan pasaran global masa kini yang tidak menentu ekoran perang perdagangan antara Amerika Syarikat dan China. Prestasi ringgit adalah sejajar dengan pergerakan kebanyakan mata wang serantau lain yang telah berubah nilai dalam lingkungan -6.5% dan 6.5% berbanding dolar Amerika Syarikat (AS). Penyusutan nilai ringgit disebabkan oleh ketidaktentuan berkaitan perkembangan geopolitik, kemerosotan sentimen pelabur dalam pasaran kewangan dunia berikutan kelemahan unjuran pertumbuhan global.

Dalam keadaan pasaran kewangan global yang tidak menentu, kadar pertukaran ringgit yang fleksibel memainkan peranan penting sebagai penyerap kejutan luaran tanpa menjejaskan aktiviti ekonomi domestik. Namun begitu, volatiliti ringgit yang ketara boleh menjejaskan aktiviti ekonomi berikutan kesukaran sektor perniagaan dan perindustrian merancang strategi dan mengambil keputusan yang wajar. Sehubungan itu, Kerajaan melalui Bank Negara Malaysia (BNM) sentiasa memastikan keadaan pasaran kewangan lebih lancar dan mengambil langkah proaktif dengan memperkenalkan langkah untuk memastikan kecairan mencukupi, pasaran yang berdaya tahan dan mengurangkan aktiviti spekulasi dalam pasaran. Langkah ini termasuk menetapkan syarat supaya sebahagian besar daripada hasil eksport dalam mata wang asing ditukarkan kepada ringgit bagi meningkatkan mudah tunai wang asing dalam pasaran dalam negeri dan meningkatkan penguatkuasaan ke atas peraturan tukaran asing sedia ada bagi mencegah aktiviti spekulasi mata wang ringgit diniagakan di luar pesisir. Pada masa sama, BNM telah memperkenalkan instrumen pelindung nilai (*hedging instruments*) dan menyediakan fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI HAJI MUKHRIZ BIN TUN DR.
MAHATHIR [JERLUN]**

TARIKH : 2 DISEMBER 2019 (ISNIN)

SOALAN

DATO' SERI HAJI MUKHRIZ BIN TUN DR. MAHATHIR [JERLUN] minta **MENTERI KESIHATAN** menyatakan sama ada Kerajaan Persekutuan berhasrat untuk membina jalan masuk ke Hospital Pendang yang sedang dibina sekarang.

JAWAPAN

Yang di-Pertua,

Projek pembinaan Hospital Pendang, Kedah telah mula dilaksanakan pada 7 Mei 2018 dan dijangka siap pada 18 Disember 2021. Kementerian tidak bercadang untuk membina jalan masuk tersebut kerana faktor-faktor seperti berikut:

- a) Jalan masuk ke Hospital Pendang telah sedia ada sekarang dan ianya boleh digunakan untuk akses ke Hospital Pendang kerana jalan sedia ada tersebut berada di hadapan tapak projek Hospital Pendang;
- b) Jalan masuk yang sedia ada sekarang di hadapan Hospital Pendang tersebut merupakan jalan dua hala yang bertar di bawah kategori Jalan R3 dan berstatus "Jalan Negeri" yang diwartakan sebagai Jalan K544; dan

SOALAN NO : 29

- c) Pembinaan jalan adalah di luar skop kontrak projek Hospital Pendang dan tiada peruntukan bagi tujuan tersebut memandangkan ianya berada di luar sempadan tapak projek Hospital Pendang.

Sekiranya Kerajaan Negeri bercadang untuk menaik taraf jalan tersebut, maka permohonan baru hendaklah dikemukakan kepada pihak Kementerian Hal Ehwal Ekonomi (MEA).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SERI DR. SHAHIDAN BIN KASSIM
[ARAU]
TARIKH : 02 DISEMBER 2019 (ISNIN)

SOALAN NO. 30

Y.B. DATO' SERI DR. SHAHIDAN BIN KASSIM [ARAU] minta **MENTERI KEWANGAN** menyatakan terdapat sebuah syarikat yang mendapat projek runding terus sebanyak RM450 juta di Kelantan. YAB Perdana Menteri menafikan terlibat dan Menteri Kewangan pulak tidak menandatangani surat tersebut. Adakah dengan penafian ini menunjukkan bahawa surat berkenaan dilakukan oleh Menteri yang lain. Siapakah Menterinya dan adakah Kerajaan akan membayar pampasan jika kontrak dibatalkan.

JAWAPAN

Tuan Yang di-Pertua,

Projek pembinaan Bangunan Gunasama Persekutuan Kota Bharu, Tunjong, Kelantan telah dirancang untuk dilaksanakan sejak tahun 2016 lagi dan perlu dilaksanakan segera kerana bangunan sedia ada terlalu usang dan memerlukan pemindahan segera bagi menjamin keselesaan dan keselamatan pelanggan dan kakitangan. Ia telah diluluskan untuk dilaksanakan melalui kaedah perolehan tender terhadap Disember 2017 dengan kos keseluruhan projek sebanyak RM576,000,000.00 yang diluluskan oleh Kerajaan terdahulu.

Walau bagaimanapun, projek tersebut tidak dapat dilaksanakan berikutan keputusan Kerajaan melalui surat bertarikh 29 Jun 2018 yang telah mengarahkan agar semua perolehan secara tender terhadap dan rundingan terus yang belum dikeluarkan Surat Setuju Terima (SST), pelaksanaannya hendaklah dibatalkan. Penilaian semula ke atas keperluan pelaksanaan projek perlu dibuat oleh Kementerian / Agensi dan ditender semula secara tender terbuka atau tender terbuka pra-kelayakan.

Mengambil kira faktor kesegeraan demi kepentingan awam, Kerajaan pada 26 Julai 2019 telah memutuskan untuk meneruskan pelaksanaan projek bagi memastikan perkhidmatan Kerajaan tidak terjejas serta mengambil kira pelbagai justifikasi termasuk pertimbangan khas oleh Kerajaan. Terkini, harga yang ditawarkan oleh syarikat pada hujung bulan Oktober 2019 adalah sebanyak RM400,000,000.00 selepas proses rundingan semula harga dan ia masih menunggu kelulusan Jemaah Menteri.

Memandangkan bahawa projek ini diteruskan selepas mendapat permintaan pelbagai pihak daripada negeri Kelantan termasuk pemimpin tertinggi negeri, maka proses rundingan dengan potongan harga besar telah dijalankan, yang tidak akan dinikmati sekiranya tidak berlakunya pertukaran Kerajaan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN CHANG LIH KANG [TANJONG MALIM]

TARIKH : 2 DISEMBER 2019 [ISNIN]

SOALAN

Minta **MENTERI PERUMAHAN DAN KERAJAAN TEMPATAN** menyatakan peraturan pemilikan rumah sendiri di kalangan rakyat Malaysia. Apakah usaha Kementerian dalam menambah peraturan pemilikan rumah sendiri.

JAWAPAN

Tuan Yang di-Pertua,

1. Untuk makluman Yang Berhormat, berdasarkan Laporan Penyiasatan Pendapatan Perbelanjaan Isi Rumah dan Kemudahan Asas 2016 yang diterbitkan oleh Jabatan Perangkaan Malaysia, peraturan isi rumah yang memiliki rumah secara keseluruhan ialah sebanyak 76.3%. Daripada jumlah ini, 73.7% adalah pemilikan rumah di kawasan bandar manakala 85.6% adalah pemilikan rumah di kawasan luar bandar.
2. Kerajaan kekal komited untuk memastikan aksesibiliti rakyat untuk memiliki rumah melalui inisiatif perumahan sedia ada seperti:

- i. **Penyediaan 1 Juta Rumah Mampu Milik (RMM)** dalam tempoh 10 tahun di seluruh negara sebagaimana Manifesto Pakatan Harapan melalui agensi-agensinya pelaksana seperti KPKT, lain-lain Kementerian, Kerajaan Negeri dan pihak swasta;
- ii. **Skim pembiayaan kewangan fleksibel** yang menawarkan pakej pinjaman menyeluruh merangkumi pembayaran berperingkat dan pembeli yang layak membayar ansuran bulanan pinjaman rumah yang lebih rendah daripada pinjaman konvensional ;
- iii. **Skim pembiayaan Dana RM 1 Bilion oleh Bank Negara Malaysia (BNM)**. Dana berjumlah RM1 bilion ini diwujudkan untuk membantu pembeli rumah daripada kumpulan berpendapatan rendah di seluruh negara bagi membiayai pembelian rumah pertama mereka. Dana ini tersedia mulai 2 Januari 2019 untuk tempoh 2 tahun atau sehingga dana RM1 bilion itu habis digunakan. Skim ini telah ditambah baik dengan pendapatan maksimum bulanan isi rumah dinaikkan sehingga RM4,360 dan harga maksimum hartanah sehingga RM300,000;
- iv. **Pemanjangan tempoh pembiayaan perumahan sektor awam di bawah Lembaga Pembiayaan Perumahan Sektor Awam (LPPSA)** di mana tempoh pembiayaan pertama dinaikkan daripada 30 tahun kepada 35 tahun;
- v. **Jaminan Cagamas SRP Berhad** untuk membantu golongan muda yang berpendapatan RM3,000 sebulan dan ke bawah untuk memiliki rumah. Cagamas SRP akan menjamin 10% (dari 90% hingga 100%) daripada pembiayaan berkenaan;
- vi. **Diskaun Plus** - penawaran diskaun oleh pemaju perumahan dengan zero deposit (yang disokong oleh skim jaminan

Cagamas/Skim Jaminan Kredit Pinjaman) meningkatkan keupayaan pembeli dengan memberi jaminan kewangan kepada pembeli;

- vii. **FundMyhome (Crowd Funding)** – Skim ini bagi membolehkan rakyat mendapatkan bantuan kewangan untuk membeli rumah melalui kaedah pinjaman terbuka. Pembeli cuma perlu membayar 20% daripada harga rumah manakala baki 80 % akan disumbang oleh pembiaya yang terlibat dan pulangan akan dikongsi bersama pada masa hadapan; dan
 - viii. **Pengecualian duti setem dan pelepasan cukai** diberikan ke atas pembelian rumah pertama yang berharga RM300,000 ke bawah berkuat kuasa mulai 1 Januari 2019 sehingga Disember 2019 yang dilaksanakan melalui Home Ownership Campaign (HOC) 2019. Pengecualian ini dapat mengurangkan bebanan kewangan isi rumah terutamanya golongan berpendapatan rendah dan sederhana.
3. Selain itu, antara inisiatif perumahan baharu yang sedang dikaji oleh kerajaan adalah:
- i. **Penyediaan program Rumah Mampu Milik di bawah KPKT iaitu Rumah Malaysia** akan menggunakan spesifikasi dan ciri-ciri di bawah Dasar Rumah Mampu Milik 2019 (DRMM) iaitu keluasan rumah minimum 900kps dan berdasarkan pendapatan isi rumah median mengikut lokasi dan negeri;
 - ii. **Program Sewa Untuk Beli/ Rent-to-Own (RTO).** Dana sebanyak 2 Bilion akan disediakan oleh institusi kewangan untuk ditawarkan kepada rakyat kumpulan B40 dan M40 terendah bagi memiliki rumah mampu milik yang berharga RM300,000 dan ke bawah secara sewaan. Seterusnya bermula

pada tahun kedua, penyewa diberi pilihan untuk memiliki hartanah kediaman tersebut setelah memenuhi syarat kelayakan pinjaman perumahan;

- iii. **Penggubalan Akta Sewa Kediaman (RTA)** bagi pemilikan perumahan persendirian. RTA yang digubal akan lebih menyeluruh dan komprehensif dalam menangani isu-isu penyewaan dan pemilikan rumah pada masa akan datang;
 - iv. **Skim perkongsian ekuiti perumahan (Cagamas Shared Equity Scheme) di bawah Cagamas Berhad.** Di bawah skim ini Cagamas akan menyalurkan 20% daripada deposit bagi pihak pembeli (secara pinjaman dengan kadar faedah yang rendah), manakala baki 80% disediakan oleh pihak bank. Cadangan ini turut membabitkan pembiayaan alternatif yang mana Cagamas akan membantu memberi jaminan sehingga 100% daripada harga rumah tersebut; dan
 - v. KPKT dengan kerjasama Pusat Maklumat Harta Tanah Negara (NAPIC) sedang membangunkan **Housing Integrated Management System (HIMS)** bertujuan untuk menyediakan sistem lengkap mengenai maklumat penawaran serta keperluan untuk mengurangkan *mismatch* dan memastikan perancangan perumahan yang lebih terancang dan sistematik.
4. Kesimpulannya, inisiatif-inisiatif ini telah dan akan dilaksanakan oleh Kerajaan bagi membantu memastikan setiap rakyat khususnya golongan B40 dan M40 mampu untuk memiliki rumah berkualiti.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI AZALINA OTHMAN SAID
[Pengerang]**

TARIKH : 2 DISEMBER 2019 (ISNIN)

SOALAN

DATO' SRI AZALINA OTHMAN SAID [Pengerang] minta **MENTERI KOMUNIKASI DAN MULTIMEDIA** menyatakan bilakah Majlis Media Malaysia (MMC) akan ditubuhkan dan adakah agensi berita kebangsaan negara BERNAMA akan dijadikan sekretariat untuk MMC.

JAWAPAN

Tuan Yang di-Pertua,

1. Untuk makluman Ahli Yang Berhormat Senator, Kementerian Komunikasi dan Multimedia Malaysia (KKMM) sedang dalam tindakan merangka cadangan dan implikasi penubuhan Majlis Media Malaysia (MMC) di bawah satu akta khusus yang akan diterajui oleh industri media itu sendiri. Kementerian juga akan mendapatkan mandat dari Jemaah Menteri untuk hala tuju seterusnya dalam memudah cara persekitaran yang kondusif untuk kebebasan media di Malaysia. Ini bagi memastikan kebebasan media tercapai namun masih lagi dalam lingkup prosedur yang ditetapkan untuk memelihara ketenteraman awam.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 2 DISEMBER 2019 [ISNIN]

SOALAN NO. 33

Minta **MENTERI PERUMAHAN DAN KERAJAAN TEMPATAN** menyatakan apakah strategi dan program-program utama Kementerian untuk tahun 2020 dalam membangunkan konsep Smart City di Malaysia.

JAWAPAN

Tuan Yang di-Pertua,

1. Untuk makluman Yang Berhormat, Kerajaan berpandangan bahawa Bandar Pintar merupakan pendekatan masa hadapan bagi pembangunan dan pengurusan bandar. Rancangan Malaysia Ke-11 (RMKe-11) telah menggariskan secara terperinci berkenaan keperluan untuk membangunkan rangka kerja inisiatif bandar pintar negara di bawah **Teras 5: Memperkukuh Infrastruktur bagi Menyokong Pertumbuhan Ekonomi**

2. Sehubungan itu, Kementerian Perumahan dan Kerajaan Tempatan (KPKT) telah membangunkan Rangka Kerja Bandar Pintar Malaysia (RKBPM) yang bertujuan untuk dijadikan sebagai panduan dan rujukan kepada Pihak Berkuasa Tempatan (PBT), kerajaan negeri,

kementerian dan jabatan, pemain industri serta pihak berkepentingan lain untuk perancangan dan pembangunan Bandar Pintar yang holistik di Malaysia.

3. RKBPM telah dilancarkan secara rasmi oleh YAB Perdana Menteri pada 23 September 2019. Dokumen ini mengandungi maklumat berkaitan pembangunan Bandar Pintar dalam konteks Malaysia seperti definisi dan bidang komponen utama Bandar Pintar, hala tuju polisi, cadangan strategi yang disertakan dengan inisiatif bersesuaian serta indikator yang mengukur pelaksanaan sesuatu inisiatif.

4. Dalam usaha untuk melaksanakan inisiatif Bandar Pintar, KPKT telah menggariskan beberapa strategi seperti berikut:

- i. meningkatkan pelaksanaan inisiatif Bandar Pintar di peringkat PBT;
- ii. memainkan peranan aktif dalam *ASEAN Smart City Network* (ASCN) dengan menjalinkan kerjasama dengan negara-negara ASEAN dan luar ASEAN seperti Republik Korea serta Jepun;
- iii. memberi bimbingan khusus kepada PBT terpilih untuk melaksanakan inisiatif Bandar Pintar khususnya dalam memberi khidmat nasihat pakar (*subject matter expert*) pembangunan Bandar Pintar;
- iv. menjalinkan kerjasama dan rangkaian strategik dengan pemain industri dan penyedia penyelesaian pintar (*smart solutions provider*) dari dalam dan luar negara bagi menyokong pelaksanaan inisiatif Bandar Pintar; dan
- v. memadankan PBT dengan pemain industri dan penyedia teknologi dalam membangunkan Bandar Pintar.

5. Kementerian telah merancang beberapa program bagi tahun 2020 dalam usaha untuk merancakkan pembangunan Bandar Pintar di Malaysia seperti berikut:

- i. sesi jelajah (*roadshow*) dan hebahan ke negeri-negeri dengan mengadakan sesi libat urus bersama PBT bertujuan untuk memberi kesedaran tentang pelaksanaan inisiatif Bandar Pintar serta mengenal pasti kesediaan Kerajaan Negeri dan PBT dalam melaksanakan inisiatif Bandar Pintar;
- ii. melaksanakan projek pembangunan Bandar Pintar di Kulim, Kedah; dan
- iii. mewujudkan *Malaysia International Centre for Sustainable Cities* (MyICSC) sebagai platform untuk menggalakkan perkongsian kepakaran dan pengetahuan serta perkembangan teknologi terkini melalui kerjasama antara agensi Kerajaan, pemain industri, ahli akademik dan badan-badan antarabangsa.

Sekian, terima kasih.

**INPUT PERTANYAAN JAWAB LISAN DEWAN RAKYAT MESYUARAT
KETIGA, PENGGAL KEDUA,
PARLIMEN KE-14 TAHUN 2019**

PERTANYAAN : JAWAB LISAN

**DARIPADA : DATIN MASTURA BINTI MOHD YAZID
(KUALA KANGSAR)**

TARIKH : 2 DISEMBER 2019 (SELASA)

SOALAN

DATIN MASTURA BINTI MOHD YAZID (KUALA KANGSAR) minta **MENTERI KOMUNIKASI DAN MULTIMEDIA** menyatakan usaha-usaha proaktif yang sedang dirancang oleh Kementerian demi merealisasikan "kebebasan media" seperti yang diucapkan oleh Menteri di Persidangan Global Kebebasan Media di London pada Julai lepas.

JAWAPAN

Tuan Yang Di-Pertua,

1. Untuk makluman Ahli Yang Berhormat, Kementerian Komunikasi dan Multimedia Malaysia (KKMM) melalui Jabatan Penyiaran Malaysia (RTM) telah menyediakan platform dan akses kepada berita dan maklumat tanpa sekatan. Akses berkenaan menerusi 4 saluran TV termasuk Saluran Percubaan Berita, 33 saluran radio dan media dalam talian. RTM juga mempelbagaikan akses platformnya sama ada secara terrestrial, satelit juga digital. Selain saluran sedia ada, RTM juga dalam perancangan untuk mewujudkan saluran-saluran baharu di platform digital MyFreeview yang berkonsep saluran khusus atau *niche channel* bagi memenuhi citarasa penonton yang lebih selektif.
2. Menerusi platform berkenaan, RTM sentiasa membuat hebahan dan menyebarkan maklumat yang menyeluruh mengenai dasar, aktiviti dan program kerajaan agar rakyat mendapat fakta yang tepat dan sahih. Dengan siaran berita setiap jam melalui Radio dan TV, serta akses kepada maklumat dalam

taliannya, rakyat tidak akan ketinggalan dalam sebarang maklumat jika mereka mengikuti siaran RTM.

3. Dalam menyebarkan maklumat, RTM juga senantiasa mengamalkan konsep liputan berimbang dan bertanggungjawab. Liputan RTM tidak mengambil kira fahaman politik sebaliknya mengutamakan faedahnya kepada rakyat dan negara. Ia selaras dengan ketetapan Kod Etika Penyiaran yang menjadi rujukan RTM, yang menggariskan keutamaan nilai berita, memuatkan pandangan pro dan kontra semua pihak. Ia juga seiring dengan matlamat memberi kebebasan untuk penyiar berkarya dan berkeaktiviti, tetapi mematuhi etika dan memenuhi tanggungjawab sosial kepada masyarakat.

4. BERNAMA juga melalui saluran radio dan TV turut memberi ruang kepada semua pihak untuk mengutarakan pendapat masing-masing dalam program terbitan BERNAMA. Ini sejajar dengan peranan BERNAMA bagi melaporkan berita secara benar, adil dan saksama di samping dapat mengekalkan keharmonian masyarakat majmuk.

5. Manakala, Jabatan Penerangan Malaysia (JaPen) telah mengadakan pelbagai usaha untuk meningkatkan pendidikan bagi memastikan tahap kewartawanan yang beretika dan profesional terus dibina. Ke arah itu, JaPen telah menjalin kerjasama strategik dengan Malaysian Press Institute (MPI) dan Institut Penyiaran dan Penerangan Tun Abdul Razak (IPPTAR) bagi menjalankan kursus-kursus kewartawanan untuk media arus perdana dan juga media sosial.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 2 DISEMBER 2019 [ISNIN]

SOALAN

Minta **MENTERI PERUMAHAN DAN KERAJAAN TEMPATAN** menyatakan status secara terperinci mengenai pembangunan projek-projek perumahan Kerajaan seperti Vista Leila Idaman dan PR1MA@Sandakan City Centre yang terbiar dan adakah pembangunan terbiar tersebut dalam rancangan Kementerian untuk memulihkannya demi kebaikan rakyat.

JAWAPAN

Tuan Yang di-Pertua,

1. Untuk makluman Yang Berhormat, projek perumahan PR1MA iaitu Residensi Sandakan City Centre yang terletak di daerah Sandakan terdiri dari 750 unit. Projek ini telah diteliti dan diperhalusi melalui Pelan Rasionalisasi PR1MA dan telah diputuskan untuk diteruskan. Peratusan kemajuan tapak di Residensi Sandakan City Centre setakat 20 September 2019 adalah 74.78%. Projek ini dijangka siap pada Mei 2020.
2. Untuk makluman Yang Berhormat juga, Pembangunan Vista Leila Idaman ini adalah salah satu projek Rumah Mampu Milik di bawah Syarikat Perumahan Negara Berhad (SPNB). Semua projek-projek di bawah SPNB kini di dalam proses kajian semula termasuk projek Vista Leila Idaman. Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

DARIPADA : DATO' HAJI CHE ABDULLAH BIN MAT NAWI [TUMPAT]

TARIKH : 2 DISEMBER 2019 (ISNIN)

SOALAN

DATO' HAJI CHE ABDULLAH BIN MAT NAWI [TUMPAT] minta **MENTERI KOMUNIKASI DAN MULTIMEDIA** menyatakan cadangan meningkatkan hukuman dalam Akta Komunikasi dan Multimedia 1998 (Akta 588) dan Kanun Keseksaan (Akta 574) bagi kesalahan-kesalahan menghina raja-raja, agama Islam, mencetuskan api perkauman dan sebagainya.

JAWAPAN

Tuan Yang Dipertua,

1. Untuk makluman Ahli Yang Berhormat, Kementerian Komunikasi dan Multimedia Malaysia dan Suruhanjaya Komunikasi dan Multimedia Malaysia sedang mengkaji pindaan kepada Akta Komunikasi dan Multimedia 1998 [Akta 588] di mana pendekatan secara menyeluruh akan mengambil kira semua peruntukan undang-undang sedia ada, juga memastikan sebarang hukuman adalah efektif dan tiada unsur penganiayaan.
2. Secara umumnya, sebarang peningkatan atau pengurangan hukuman di bawah mana-mana peruntukan termasuk seksyen 233 Akta 588, adalah tertakluk kepada budi bicara dan kelulusan pihak Jabatan Peguam Negara. Pindaan kepada seksyen 233 Akta 588 ini hanya akan dibuat selepas kajian ini telah selesai dan pindaan kepada Kanun Keseksaan dimuktamadkan.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' HAJI JALALUDDIN BIN HAJI
ALIAS [JELEBU]**

TARIKH : 2 DISEMBER 2019 (ISNIN)

SOALAN

DATO' HAJI JALALUDDIN BIN HAJI ALIAS [JELEBU] minta **MENTERI KOMUNIKASI DAN MULTIMEDIA** menyatakan adakah Kementerian akan mengkaji semula larangan untuk menggunakan parabola selain dari ku band yang banyak digunakan kini terutamanya di Sabah dan Sarawak.

JAWAPAN

Tuan Yang di-Pertua,

1. Pihak kerajaan melalui Kementerian Komunikasi dan Multimedia Malaysia (KKMM) telah menetapkan bahawa pemilikan dan penggunaan Parabola oleh orang awam adalah tidak dibenarkan.
2. Secara dasarnya, Kementerian ini tidak bercadang untuk menarik semula larangan tersebut setelah mengambil kira faktor serta kepentingan khusus yang menjadi keutamaan kerajaan.
3. Keputusan tersebut dilihat mampu melindungi serta mengekang aktiviti mengakses kandungan yang tidak sesuai dan bertentangan dengan moral, budaya dan ideologi bangsa dan negara ini dengan sewenang-wenangnya oleh kalangan orang awam.

4. Dasar sedia ada merupakan mekanisme kawalan dan tapisan terhadap kandungan yang boleh diterima dari setelit setelit luar negara kerana penyedia perkhidmatan kandungan luar negara tidak dilesenkan di Malaysia dan tidak tertakluk kepada perundangan negara.
5. Selain itu larangan ini mampu menjadi pemangkin kepada pertumbuhan industri penyiaran negara melalui percambahan penyedia kandungan, pemberian keutamaan kepada kandungan tempatan dan persaingan sihat antara pemegang-pemegang lesen dalam memberi siaran bermutu dan berliputan luas.
6. Bagi membantu rakyat di pedalaman menikmati perkembangan dunia luar, pihak swasta seperti ASTRO telah menyediakan perkhidmatan “Njoi” iaitu perkhidmatan mengakses siaran penyiar TV Malaysia (RTM/MediaPrima/ASTRO) secara PERCUMA melalui parabola ASTRO. Liputan perkhidmatan ini adalah meliputi seluruh negara di Semenanjung, Sabah dan Sarawak. Melalui perkhidmatan ini, rakyat Sabah & Sarawak boleh menikmati siaran TV yang disediakan oleh pihak Kerajaan dan swasta di Malaysia secara percuma.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI CHE ABDULLAH BIN MAT NAWI
[TUMPAT]**

TARIKH : 2 DISEMBER 2019 (ISNIN)

SOALAN

DATO' HAJI CHE ABDULLAH BIN MAT NAWI [TUMPAT] minta **MENTERI KESIHATAN** menyatakan sejauh mana penerapan nilai agama dilaksanakan bagi mengubati penyakit yang berkaitan masalah mental.

JAWAPAN

Yang di-Pertua,

Penyakit mental di hospital-hospital Kementerian Kesihatan di Malaysia dirawat dengan menggunakan kaedah perawatan moden yang telah diiktiraf dan terbukti keberkesanannya (*evidence-based*) menggunakan rawatan ubat-ubatan, terapi psikososial, pendidikan terhadap pesakit dan keluarga serta program rehabilitasi yang dijalankan di hospital-hospital dan MENTARI. Penerapan nilai agama dalam rawatan ini dilihat baik bagi penyembuhan penyakit mental secara holistik dan menyeluruh. Namun begitu, pegawai agama hospital tidak terlibat dalam perawatan penyakit mental secara *direct* dan berterusan. Mereka bukan sebahagian daripada pasukan rawatan klinikal psikiatri dan tidak bertauliah untuk merawat. Namun, pakar psikiatri ada merujuk kes-kes untuk bimbingan dan nasihat agama kepada pegawai agama sebagai khidmat sokongan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN OSCAR LING CHAI YEW [SIBU]

TARIKH : 2 DISEMBER 2019 (ISNIN)

SOALAN

TUAN OSCAR LING CHAI YEW [SIBU] minta **MENTERI KOMUNIKASI DAN MULTIMEDIA** menyatakan jumlah peruntukan untuk fiberisasikan (*optic fibre*) network di Sarawak, Sabah dan semenanjung Malaysia pada tahun 2016-2019. Senaraikan mengikut tahun dan negeri.

JAWAPAN

Tuan Yang di-Pertua,

1. Melalui inisiatif yang dibiayai menerusi Kumpulan Wang Pemberian Perkhidmatan Sejagat (PPS), dianggarkan sebanyak RM248 juta telah diperuntukkan untuk pelaksanaan projek peluasan Rangkaian Gentian Optik di seluruh negara. Selain itu, pihak Kerajaan juga telah memperuntukkan sebanyak RM287 juta melalui projek Jalur Lebar untuk Orang Ramai ("BBGP").

2. Pecahan peruntukan mengikut negeri bagi tahun 2014 sehingga kini adalah seperti dalam jadual di bawah.

No	Negeri	Peluasan Rangkaian Gentian Optik (KM)	Anggaran Kos (RM '000)	BBGP (KM)	Anggaran Kos (RM '000)
1	Johor	97	9,700	-	-

SOALAN NO : 39

2	Kedah	342	34,200	48	4,800
3	Kelantan	644.99	69,199	28	2,800
4	Melaka	-	-	-	-
5	N. Sembilan	180	18,000	-	-
6	Pahang	673.6	70,260	62	6,200
7	Perak	217	21,700	56	5,600
8	Perlis	3	300	-	-
9	P. Pinang	-	-	-	-
10	Sabah	-	-	1,313	131,306
11	Sarawak	-	-	1,237.3	123,730
12	Selangor	28	2,800	-	-
13	Terengganu	221	22,100	130	13,000
14	WP KL	-	-	-	-
15	WP Labuan	-	-	-	-
16	WP Putrajaya	-	-	-	-
	Jumlah	2,407 KM	RM 248,259	2,874 KM	RM 287,436